

पेन हुपिस्ता पोल्लें योहानुंक पेन हुपिस्ता पोल्लें

इद पुस्तकमता बारेमते गिचचो परिचयम

रासतोना पोरोल: योहान

रासता कालम: इसवि सन 96

इद पुस्तकम येसु सामिना वरोर सिस्सुड योहान रासतोर. येसुन नम्मुताहाटीं ओन पतमोस दीबिते मनना जेलने वाटतुर. ओर जेलने मननेकेन, वायाना कालमते जर्गाना पोल्लें येसु सामि ओन्कु हुपिस्तोर. अवे पोल्लेन योहान ई पुस्तकमते रासतोर.

अद कालमते लोकुल्क येसुनपोर्गे विस्वासम कीताहाटीं, रोम सरकार वेल्ले तकलिप हिथुंदु, गानि कस्टाल्क, तिप्पल्क अय्ते वायनुंगे, अयना बोर अय्ते आकिरदाका विस्वासमते गट्टिगा निल्सि मनांतोर, ओन्के पिस्वरता इनाम दोर्कता, इल्हा वेहचि येसु सामि आ तकलिपते मत्ता विस्वासुल्कुना विस्वासमतुन गट्टिगा कीतोर. येसु सामि मर्ग मल्सि वायानादाका बोर अय्ते विस्वासमते गट्टिगा मनंतुर, ओर्क पूना बूमि, पूना मब्बु, पूना येस्सलेम दोर्कता इंचि येसु सामिनाहेंदाल योहान ई पुस्तकम रासतोर.

बगा बतल मंता

जोहार आनि परिचयम 1:1-8

एडुं कलिसियानोर्क रासता सिट्टिं आनि अवुना मुक्य उद्देसम 1:9-3:22

एडुं सिक्कां तंचि मत्ता पुस्तकम 4:1-8:5

एडुं तूताकोम्कु 8:6-11:19

मासुल तरास आनि रोंडु जिवरासिं 12:1-13:18

तीराता दर्सनाल्क 14:1-15:8

पेनदा होंगुना एडुं वाटिं 16:1-21

बेबिलोनता नासडेम आनि देय्यमता ओडुमळ 17:1-20:10

आकिरता न्यायम 20:11-15

पूना स्वर्गम, पूना बूमि, पूना येस्सलेम 21:1-22:5

आकिरता बोदां 22:6-21

योहानुंक पेन हुपिस्ता पोल्लें

1 इव पोल्लें, वायाना कालमते बिरानेन जर्गानव आंदुं, इवुन येसु किरिस्तु ओना सेवाकुल्लुक वेहना इंचि पेन ओन्क अप्पजेपता. अस्के येसु ओना उंदि दूतातुन योहान इनना वरोन सेवाकुनगा लोहचि, ओन्क रासालय वेहतोर.

2 अस्के ओर पेनदा पोल्लेता बारेमते, येसु किरिस्तुना गवाइता बारेमते आनि ओर हळता अन्नि पोल्लेना बारेमते गवाइ वेहतोर.

3 पेनदाहेंदाल वाता ई वायाना कालमते जर्गना पोल्लेन बोर अय्ते हदवंतुर, केंजांतुर आनि अव्ते रासि मत्ता परकारम ताकंतुर ओर आसिर्वाद दोर्कतोर आंदुर. बारित्ते इव पोल्लें जर्गना वेला दग्गेर्क एवता.

योहान येसुना पोल्लेन एडुं कलिसियानोर्क वेहांतोर

4-5 आसिया राज्येमते मनना एडुं कलिसियानोर्क नना योहानुन बतल रासेक इत्ते, इंदके मनानद, मोदोलताल मत्तद आनि मुन्ने वायाना मंता आ पेनदाहेंदाल, दाना राजगद्देता मुन्ने मनना आ एडुं आत्मानाहेंदाल इंका विस्वासमलायक गवाइ मत्ता येसु किरिस्तुनाहेंदाल मीकु कुर्पा, सांति दोर्किंकांटी. येसु हातोरान्तेटाल जीवाते तेदता मोदाटा मनकल आंदुर. ओर ई बूमिपोर्गेटा राजालोरा राजाल आंदुर. मना अंटोर्कुन पावरम कियानोर आंदुर, इंका ओना नेत्तुरतुन पोंगागोटसि मनाकुन मना पापाल्कुनाल पाय्सतोर.

6 मना पेनबाबाना पेद्दातनम, अदिकारम बस्केळ्ळक मननाहाटी ओर मनाकुन पेनदा राज्येमतोर आनि पेर्मालोर्क कीतोर. आमीन!

7 हुळाट, येसु किरिस्तु मब्बु तेर्पेनतोनि वासेक मंतोर. अंतोर ओन हळानुर. ओरव्ते ओन कोह्कतोरगुडा मंदानुर. दुनियातोर अन्नि वंसाल्कुना लोक्कुल सातितुन तंचेके दुक्कम कियानुर. हो इल्हे आयार आमीन!

8 “ननाने अल्पा आनि ओमेगा* आंदुन. ननाने मोदाटोन, इंदके मनानोन, मर्ग वायानोन आनि अन्निकन्ना सक्तिमंतुनगुडा ननाने आंदुन” इंचि पेन इंता.

किरिस्तुना दर्सनम

* 1:8 अल्पा आनि ओमेगा ग्रीक बासाते अल्पा सुख्खना अक्सरम आनि ओमेगा आकिरता अक्सरम आंदु.

9 नना योहानुन मीवा दादान आंदुन. येसु बोगांसता तिप्पल्कुने, राज्येमते आनि ओक्के पियमळते मीवातोनि दंटाते मंतन. नना पेनदा पोल्ले आनि येसुना बारेमते गवाइ वेहताहाटी पतमोस इनना दीबेतगा बंद कीसि मंतन.

10 सामिना रोजुननाड, इत्ते अयतारम, नना पवित्र आत्माते निडिस मत्तन. नावा पज्जो तूताकोमता आवाजनसौंटा पेद्दा आवाज केंजावाता.

11 “निमे बतल अय्ते ह्ळांतिन अदुन पुस्तकमते रासि, इपीसि, स्मुरना, पेर्गम्म, तुयतीरा, सरदिस, पिलाडेलपिया आनि लोदिकिया इव एंडुं कलिसियानोर्क लोहचीम” इंचि इत्ता.

12 अस्के, नातोनि बोर वळ्ळसेक मंतोर इंचि ह्ळालय पज्जो तिरियसि ह्ळतन अय्ते, नाक बंगारमता एंडुं दीसोडिं दिसतां.

13 अव एंडुं दीसोडिन नड्डुम वरोर मनकना रूपमते पुटतोर मत्तोर. ओर पोडगु कपडि केरसि मत्तोर ओना सातिक बंगारमता पट्टा दोहचि मत्ता.

14 ओना तल्ला, ओना केल्लक तेल्ला गोर्रेता बूरालेसीं, बर्पुनलेसीं तेल्लगा दिस्सेक मत्ता. ओना कळ्ळक तळमिता वेल्गुनलेसीं मत्तां.

15 ओना काल्क कोल्मिटे वाटसि एर्गा आता इत्तोळलेसीं मेर्सेक मत्तां. ओना लेंग समुद्रमता वेल्लेने एता तळालेसीं मत्ता.

16 ओर ओना तिना कय्दे एंडुं सुक्कान पीसि मत्तोर. ओना तोळ्दाल रौंडु बाजुकुंक आयदार्क मत्ता कसेरलेसीं पेय्सेक मत्ता. पिय्यल आतस्के पोळ्दु बल्हा मेर्सेता अल्हा ओना तोड्डि मेर्सेक मत्ता.

17 बस्के अय्ते ओन नना ह्ळतन, अस्के नना हाताप आसि ओना काल्कुनगा अरतन. अस्के ओर ओना तिना कय्दुन नापोर्गे इरसि, “निमे वेरियमा सुस्व आनि आकिर ननाने आंदुन, नना पिस्सि मंतन.

18 नना अय्ते हासि मत्तन गानि ह्ळा, इंदके नना बस्केळ्ताहाटीं पिस्सि मनंतन. हामुर आनि नरकमता चाबि नहागेन मंता.

19 निमे इदवेरादाका ह्ळता पोल्लें, बव अय्ते जर्गसेक मंतांगो आनि मुन्ने जर्गानव अन्नि पोल्लें रासि इर्ग.

20 निमे नावा तिना कय्दे ह्ळता एंडुं सुक्कां आनि बंगारमता एंडुं दीसोडिना मर्ममता अर्तम इल्हा मंता; एंडुं दीसोडिं इत्ते एंडुं कलिसियां आंदु आनि एंडुं सुक्कां इत्ते, उंदि-उंदि कलिसियाता उंदि-उंदि दूता आंदु” इंचि इत्ता.

2

इपीसि कलिसियातोरक पेनदा पोल्लें

1 इपीसि सहरता कलिसियाता दूताक इल्हा रासा. बोर अय्ते ओना तिना कय्दे एडुं सुक्कां पीसि मनांतोर, आनि बंगारमता एडुं दीसोडिन नड्डुम तिरियंतोर इव ओना पोल्लें आंदु.

2 निमे कियाना कबाहक, नीवा मेहनत आनि ओप्के नाक एरपाटे. अल्हेने निमे सेड्डा लोकुल्कुन हय्सिन आनि बोर अय्ते “नना प्रेरित” इंचि इनकुंतुर गानि ओरा परिकसा एततस्के ओर नीकु आबद्दम वळ्ळतद दिसतुर.

3 निमे ओप्के पीसि मनांतिन. नावा पोरोलहाटीं तकलिप अरसेक मंतिन गानि तकांचा हिल्लिन इंचि नाक एरपाटे.

4 गानि नीवा विरोदमते नाकु उंदि पोल्ले मंता. अद बतल इत्ते, निमे मुन्ने नाकुन बल्हा पावरम कियिदिनो अल्हा इंदके कीसेक हिल्लिन.

5 निमे बद परिस्तितीते अय्ते अरतिनो अदुन मति कीम. मनसु मार्सकुंचि मुन्ने कीता कबाहकुन मर्मा कीम. निमे गिता मनसु मार्सकुनाकुंटे नना वासि नी वेडसितुन अद जागाताल तेंडसि पोहांतन.

6 अयना नी लोप्पो इद उंदि बेसता पोल्ले मंता अद बतल इत्ते, निमे निकोलिया लोकुल्कुना कबाहकुन हय्सिन, अबुन ननागुडा हय्सोन.

7 पवित्र आत्मा कलिसियातोरक बतल वेहांता अदुन, केव्क मत्तोर बेस केंजिर. बोर अय्ते गेलसांतोर नना ओन्क स्वर्गमते पेनदागा मनना पिस्वरता मराता पंडि तिनालय हीतन.

स्मुरनाता कलिसियातोरक पेनदा पोल्लें

8 स्मुरना सहरता कलिसियाता दूताक इल्हा रासा. बोर अय्ते मोदोल आनि आकिर आंदुर, बोर अय्ते हासि मर्मा जीवाते तेदतोर ओर बतल इंतोर इत्ते,

9 “नीवा तिप्पल्क आनि गरिबतनम नाकु एरपाटे. (गानि निमे सिरमंतुने आंदिन) बोर अय्ते नीवा अपमानम कींतुर, मोमोट यहुदिल्क आंदुम इंचि इंतुर, गानि असल ओर आयुर. ओर देय्यमता दर्मसास्त्रम कराहना लोतुर आंदुर.

10 बव तिप्पल्क अय्ते नीकु वायानव मंतां अबुना बारेमते निमे वेरियमा. हुळ्ळट! देय्यम मी अव्टेटाल इच्चुर लोकुल्कुन जेलने वाटंता, मीवा विस्वासमता परिकसा एतालय अल्हा जर्गार. मीकु पदि रोजकु तिप्पल्क अरपीता. हायाना वेला

वायिनागानि मिमेट विस्वासमते गट्टिगा मंटु. अस्के मीकु पिस्वरता किरिटम हीतन” ईचि इत्ता.

11 पवित्र आत्मा कलिसियातोक बतल वेहंता अदुन, केव्क मत्तोर बेस केंजिर. बोर अय्ते गेल्सांतोर ओन्क रोंडो हामुरताहेंदाल बतल नुकसान आयो.

पेर्गमता कलिसियातोक पेनदा पोल्ले

12 पेर्गमता सहरता कलिसियाता दूताक इल्हा रासा. बोर अय्ते रोंडु आयदार्कुना कसेर पीसि मनांतोर ओर बतल इंतोर इत्ते,

13 बगा अय्ते देय्यमता राजगद्दे मंता अग्गेन निमे मनांतिन ईचि नाकु एरपाटे. अयना ना पोरोलते निमे निल्सि मंतिन. नावा विस्वासमगल्ला सेवक अंतिपान मीवा नड्डुमे देय्यम मनना जेगाते हव्कतुर, अव रोजकुनेगुडा निमे नावा पोर्रीटा विस्वासमताल पजोळ्क होना हिल्लिन.

14 गानि नीवा विरोदमते नाकु कोन्नि पोल्ले वेहनद मंता. इस्राएल लोकुकुन हिड अरहानाहाटीं बिलाम इनना कबुरतोर बालाक इनना राजांक बतल अय्ते कराहतोरो, अवुन पीसि ताकानोर मीवा नड्डुम मंतुर. बोम्मांक मोळ्कता वस्तुकुन तिनगोम, बोगमतनम कियगोम इंजि बिलाम करहंदुर.

15 अल्हेने मीलोपो इच्चुर लोकुलक निकोलियातुरा करहाताप ताकानुर मंतुर, ओर्कुन ननागुडा हय्सोन.

16 अदुनहाटीं मीवा मनसु मार्सकुंटु. इल्हा कियाकोंटे नना बिरानेन मिहगा वासि, ना तोळ्दा कसेरतोने ओरतोनि लडाइ कीतन.

17 पवित्र आत्मा कलिसियातोक बतल वेहांता अदुन, केव्क मत्तोर बेस केंजिर. बोर अय्ते गेल्सांतोर ओन्क मक्किचि इरता मन्ना आनि उंदि तेल्ला बंडा हीतन. आ बंडापोर्री उंदि पूना पोरोल रासि मनंता अद बोन्क अय्ते दोर्कार ओन्के तेळियार.

तुयतीराता कलिसियाता दूताक पेनदा पोल्ले

18 तुयतीराता सहरता कलिसियाता दूताक इल्हा रासा. बोना कळ्क अय्ते पोत्तना तळमिलेसीं मंतां, काल्क कोल्मिटे काचाहता इत्तोडिलेसीं मंतां आ पेनदा मरि इल्हा वेहांतोर:

19 निमे कियाना कबाहक, ना पोर्रीटा नीवा पावरम, विस्वासम, निमे कियाना सेवा, तिप्पल्कुने नीवा ओप्के, इव अन्नि नाकु तेळियसे. नीवा सुस्वना कबाहकुंकन्ना इंदकेटा कबाहक एक्को बेस मंतां.

20 गानि नी विरोदमते नाकु उंदि पोल्ले वेहानद मंता. जेजेबेल इनना मुरतळ, नना पेनदा कबुरतदुन इंचि वेहकुंचेके नावा सेवाकुल्कुंक, बोम्मांक मोळकता वस्तु तिनगोम, बोगमतनम कियगोम इंचि कराहचि ओर्कुन पसांचेके मंता. असोंटा मुर्ताटुन निमे निहगा मना हीसतिन.

21 मनसु मार्सकुननाहाटीं नना दानकु मोका हीतन, गानि बोगमतनमताल मनसु मार्सकुनालय दाना इच्चा हिल्ले.

22 अय्ते हुळाट! नना दानु कटुल पिया गोतंतन, दानतोनि बोर अय्ते बोगमतनम कीतुर ओरगुडा असोंटा कबाहकुनाल मनसु मार्सकुनाकुंटे ओर्कुन बागा तिप्पल्कुने अरहतन.

23 अद कराहता पोल्लेन पीसि ताकाना दाना पिलाल्कुन नना हव्किसि पोहंतन. अस्के, बुद्धितुन आनि मनसुन एरपाट कियानोन ननाने आंदुन इंचि अन्नि कलिसियातोरक तेळियार. पजा मीकु वरो-वरोंक मिमेट कीता कबाहकुन पीसि, इनाम हीतन.

24 गानि तुयतीराते अद कराहताप ताकवोर कळमतोर मिमेट बोर अय्ते विस्वासिर मंतिरो, मीक नना बतल वेहांतन इत्ते, मिमेट देय्यमता लोप्पोटा मर्ममतुन एरपाट किया हिल्लिर अदुनहाटीं नना मीपोरों इंका बर्वु वाटोन.

25 नना मल्सि वायनदाका सिराप मिहगा मनना विस्वासमतुन गट्टिगा पीसि मंटु.

26 बोर अय्ते गेल्लि आकिरदाका नावा कबाहकुन कीतोर ओन्क नना अन्नि दुनियाता अन्नि देसेल्कुना लोकुल्कुनपोरों अदिकारम हीतन.

27 कुम्मल कीता अळकन कच्चिता दुड्डुने तुकडां-तुकडां कीताप लोकुल्कुनपोरों ओर राज्येम कीतोर. बाबानाहेंदाल नाकगुडा इसोंटेदे अदिकारम दोर्कता.

28 अल्हे ननागुडा ओनकु हक्केटा सुक्कातुन हीतन.

29 कलिसियातोरक पवित्र आत्मा बतल वेहांता अदुन, केव्व मत्तोर बेस केंजिरकांटी.

3

सरदिसता कलिसियातोरक पेनदा पोल्लें

1 सरदिस सहरता कलिसियाता दूताक इल्हा रासा. बोनगा अय्ते पेनदा एडुं सुक्कां आनि एडुं आत्मां मंतां ओर बतल इंतोर इत्ते, निमे कियाना कबाहक नाकु

एरपाटे; नीवद निमे “जीवाते मंतन” इंचि इनकुंचंतिन गानि असल इत्ते निमे हासि मंतिन.

2 निमे तेल्विते मन, पेनदा मुन्ने नीवा कबाह्क पुरा आताप नाक दिस्सेक हिल्ले. अदुनहाटी, मय्सि मत्ता कबाह्कुन पुरागा कीम. मायसि होनालय आता विस्वासमतुन गट्टिगा कीम.

3 अदुनहाटी केंजता बोदातुन निमे बल्हा ओप्कुत्तिनो अदुन मति कीम. मति कीसि अल्हे ताका आनि मनसु मार्सकुन. ओक्कला निमे जेगर्ता मनाकोंटे, नना वरोर दोंगानलेसी वांतन, नना बद वेलाक निहागा वांतन, दाना पत्तागुडा नीकु दल्गो.

4 गानि सरदिस सहरता इच्चुर विस्वासुल्क, ओरा कपडिंक डाग अंटाकोंटा इरताप, ओरा ताकमळतुन बेस इरतुर. ओर तेल्ला कपडिं केरताप सत्तेमते नावातोनि ताकनुर; ओर अल्हा ताकना लायक मंतुर.

5 बोर अय्ते गेलसांतोर, ओन्क इसोंटा तेल्ला कपडिं केर्समड जर्गार आनि नना ओना पोरोलतुन पिस्वरता पुस्तकमताल तंचि पोहोन. अल्हेने नावा बाबाना मुन्ने आनि दूताना मुन्ने ओना पोरोलतुन ओपकुंतन.

6 पवित्र आत्मा सरदिसता कलिसियातोरक बतल वेहांता अदुन, केव्क मत्तोर बेस केंजिरकांटी.

पिलदेलपियाता कलिसियातोरक पेनदा पोल्लें

7 पिलाडेलपिया सहरता कलिसियाता दूताक इल्हा रासा. बोर अय्ते पवित्र आनि सत्तेमतोर मंतोर, ओर दाविदना अदिकारता चाबि ईरंतोर, ओर तेंडता तल्पुन बोरें बंद किया पर्रेर आनि ओर बंद कीता तल्पुन बोरें तेंडा पर्रेर, ओर बतल इंतोर इत्ते,

8 निमे कियाना कबाह्क नाक एरपाटे, नीवा ताकत तक्को मंता गानि नावा पोल्लेता पालन कीतिन आनि नावा पोरोलतुन एतोन इंचि इना हिल्लिन. अदुनहाटी हळा! नीवा मुन्ने उंदि तल्पु कुल्ला कीसि इरतन, अदुन बोरें बंद किया पर्रेर.

9 हळा! नना देय्यमता दर्मसास्त्रम कराहना लोता लोकुल्कुन निहागा वायागोटंतन, ओर “मोमोट यहुदिक आंदुम इंचि इंतुर” ओर यहुदि आयुर गानि ओर आबदूदम वळ्कसेक मंतुर. नना ओर्कुन निहागा थायसि नीवा काल्क मोळ्का गोटंतन. अस्के नना मीकुन बच्चोन पावरम कींतन इंचि ओर्क तेळियंता.

10 निमे ओप्के पीसि नावा पोल्लेते ताकतिन अल्लेन, केंजतिनगुडा. अदुनहाटी ई दुनियाता लोकुल्लकुना पट्टु हळालय बतलयते परिकसा वायाना मंता, अवेटाल नीकुन कापाळंतन.

11 नना बिरानेन निहागा वांतन. नीवा किरिटमतुन निहागटाल बोरे गुंजा मन्नि इंचि, निहागा बतलयते विस्वासम मंता अदुन इका गट्टिगा पीसि ताका.

12 बोर अयते गेलसांतोर, ओन नना नावा पेनदा गुळिते बस्केने पलाते पेयसाकोंटा उंदि कंबालेसी निपसंतन. नना ओनपोर्री नावा पेनदा पोरोल, नावा पेनदागटा स्वर्गमताल हिळु वायाना पूना येस्सलेमता पोरोल आनि नावा पूना पोरोल रासंतन.

13 पवित्र आत्मा पिलदेलापियाता कलिसियातोरक बतल वेहांता अदुन, केव्व मत्तोर बेस केंजिरकांटी.

लोदिकियाता कलिसियातोरक पेनदा पोल्लें

14 लोदिकिया सहरता कलिसियाता दूताक इल्हा रासा. बोर अयते आमीन इननोर, विस्वासमगल्लोड, निजम गवाइ वेहानोर, इका पेन तयार कीता अन्निटवुने मोदोल मनकल आसि मंतोर, इव पोल्लें ओनव आंदुं.

15 निमे कियाना कबाहक नाकु एरपाटे, विस्वासमते निमे सल्लागा हिल्लिन गरम हिल्लिन. निमे सल्लागा हिलाकोंटे गरम मंचि मत्ते बेस आसि मनवळ.

16 निमे सल्लागा हिल्लिन, गरम हिल्लिन एच्चगा मंतिन. अदुनहाटी नीकुन नना ना तोळदाल पलाते कक्कंतन

17 निमे अयते, “नना सिरमंतुन, नहगा अन्नि मंतां, नाकु बतल तक्को हिल्ले”, इंचि इनकुंचंतिन. गानि नीकु इदु एरपाट हिल्ले गदा, निमे पेद्दा हेडसोत्तोन, गति हिल्वोन, गरिबोन, गुड्डिन, कुळकें मंतिन इंचि.

18 अदुनहाटी, निमे विस्वासम लोप्पो निजम मत्ता मनकल आयानाहाटी नना नीकु उंदि उपायम वेहांतन अद बतल इत्ते, तळमिते सुद्द कीता बंगारम निमे नहागटाल एता. दानहेंदाल निमे सिरमंतुन आकिन. कुळकें मत्तद हळसि सिग्गु होनामन्नि इंचि केरालय तेल्ला कपडि नहागटाल एता. कळक बेस दिस्सनाहाटी कळकुने वाटालय मत्तु अस्सा.

19 बोन-बोन अयते नना पावरम कीतन, ओनकु गट्टिगा वेहिचि, सुद्रांचा गोट्टंतन. अदुनहाटी इरगा जोसुने मंचि मनसु मार्सकुन्नु.

20 हळा, नना तल्पुनगा नित्तिसि तल्पुन टोक-टोक तंतस्के; बोर अय्ते ना लेंग केंजसि तल्पु तेंडांतोर, नना ओनगा लोप्पो दांतन, होंचि ओनतोनि कलियसि गाटो तित्तन, आनि ओर नातोनि तितोर.

21 बल्हा अय्ते नना गेल्लिसि नावा पेनबाबानतोनि ओना राजगद्देपोरें होंचि उदतन. अल्हे बोर अय्ते गेल्लांतोर ओन नना नातोनि नावा राजगद्देपोरें उपसंतन.

22 पवित्र आत्मा लोदिकियाता कलिसियातार्क बतल वेहांता इत्ते, केव्क मत्तोर बेस केंजिरकांटी.

4

पेन योहानुंक स्वर्गम हुपसंता

1 इव अन्नि आतस्के, स्वर्गमते उंदि तल्पु कुल्ला मत्तद नाकु दिसता. मोट्टा मोदाला नना केंजता आवाज तूताकोमता आवाजलेह्का मत्ता. अदे आवाज नाकुन, “निमे इगे पोर्गे वा, इव अन्नि आतस्के बव पोल्लें अय्ते जर्गानव मंतांगो अवुन हुपसंतन,” इंचि इत्ता.

2 अस्केने नना पवित्र आत्माते निंडतन. नाक स्वर्गमते राजगद्देपोरें बोरो वरोर उद्दिदिस मत्तद दिसतोर.

3 आ राजगद्देपोरें बोर अय्ते उद्दिदिस मत्तोर ओर यसब आनि मानिक इनना मेर्सना बंडालेसीं दिस्सेक मत्तोर. आ राजगद्देता सुट्टु मरकत इनना मेर्सना बंडानलेसीं उंदि सिंगिड दिस्सेक मत्ता.

4 राजगद्देता सुट्टु इरवै नालुं राजगद्दे मत्तां. अव राजगद्देन पोर्गे इरवै नालुर एनकटा पेद्दाल्क तेल्ला कपडिं केरसि उद्दिदिस मत्तुर. ओरा तल्लानपोर्गे बंगारमता किरिटाल्कु दोस्सि मत्तां.

5 आ राजगद्देताल पिडगु वाटाना वेलगु, उस्मना आवाज आनि पेद्दा लेंग पलाते पेय्सेक मत्ता. राजगद्देता मुन्ने तळमितव एडु वेडसिं पोतसेके मत्तां. अव वेडसिं इत्ते, पेनदा एडुं आत्मा आंदुं.

6 राजगद्देता मुन्ने अद्दमतसोंटा समुद्रम दिस्सेक मत्ता. आ राजगद्देता नड्डुम, सुट्टु नालुं जीवाते मत्ता जिवरासीं नित्तिसि मत्तां. अवुंक पज्जो-मुन्ने कळ्ळे कळ्ळ निंडिस मत्तां.

7 मोदाटा जिवरासि सिंहमतालेसी, रोंडो जिवरासि कोंदातलेसी, मूडो जिवरासिता मोकोम मनकनलेसी मत्ता. आनि नालुंगो जिवरासि गुव्वा डेगातलेसी दिस्सेक मत्ता.

8 जीवाते मनना नालुं जिवरासिक हारुं-हारुं रेक्कां मंतां, अवुना मेंदुलता सुट्टु, लोप्पो कळ्ळे-कळ्ळक मंतां. अव पोद्दाला नर्का पल्हीं आराम कियाकोंटा उंदेतीर, “निमेने पवित्र, पवित्र, पवित्र, सामि पेनबाबाल, अन्निटकन्ना सक्तिमंतुन आदिन. निमेने मुन्नेटाल मत्तिन, इंदके मंतिन, मुन्नेगुडा मनांतिन” इंचि इंचेक मत्तां.

9 बस्के अय्ते अव नालुं जिवरासी, राजगद्देपोर्रो उद्दिदस मत्ता बस्केळ्ळक जीवाते मनना पेनदा स्तुति, महिमा, दन्यवाद कीतां,

10 अस्के ओर इरवै नालुर पेद्दाल्क पेनदा मुन्ने टोंगरां ऊनसि ओरा तल्लानपोर्रो मत्ता किरिटाल्कुन हिळु ईर्सि,

11 “निमेने ई दुनियाता अन्नि वस्तुक तयार कीतिन, इव अन्नि नीवा इच्चा परकारम तयार आतां. नीवा इच्चा परकारमे मंतां, निमेने मावा पेन, मावा सामिन आदिन. महिमा, स्तुति आनि ताकत नीवदे आंदु,” इंचि इंतुर.

5

एडुं सिक्कां तंचि हुटसि मत्ता पुस्तकम

1 पजा आ राजगद्देपोर्रो उद्दिदस मत्तोना तिना कय्दे नाकु उंदि पुस्तकम दिस्ता. अद लोप्पो, पलाते रोंडु पक्काने रासि मत्ता आनि दान्क एडुं सिक्कां तंचि गुंडूर्गा हुट्सि मत्ता.

2 वेल्लेन ताकत मत्ता उंदि पेनदा दूतातुन नना अगा हळतन. पेद्दा आवाजते अद, “गुंडूर्गा हुट्सि मत्ता पुस्तकमपोर्रोटा एडुं सिक्कान नेम्हाचि, दान विच्चिनालायक बोर मंतोर?” इंचि इनालय दल्गता.

3 गानि स्वर्गमते आयि, बूमिपोर्रो आयि, बूमि हिळु आयि अद पुस्तकमतुन विच्चिसि दाना लोप्पो हळना लायकतोर बोरे मनाहिल्लोर.

4 अद पुस्तकमतुन विच्चिसि हळानालायक बोरे दोर्कुवाहेंका नना इरगा अळतन.

5 अस्के “निमे अळमा. हळा! आ गुंडूर्गा हुट्सि मत्ता पुस्तकमपोर्रोटा सिक्कान नेम्हाचि अदुन विच्चिसि हळानाहाटीं दाविदना वंसंतोर, यहुदाना गोत्रमता सिंहम इंचि पोरोल होतोर वरोर, गेल्लिस मंतोर” इंचि आ पेद्दाल्कुना अव्टेताल वरोर नाकुन इतोर.

6 अस्के आ राजगद्दे, जीवाते मनना नालुं जिवरासीं आनि पेद्दाल्कुना नड्डुम, मोक्कु हीतदुनलेसीं उंदि गोर्रि पोरि नित्तिसि मत्तद नना हळतन. दान्क एडुं कोहकु, एडुं कळ्ळक मत्तां. आ एडुं कळ्ळक इत्ते, पेन बूमिपोर्रो अन्नि दिक्कुल्कुने लोहता दाना एडुं आत्मां आंदुं.

7 अद गोर्रि पोरि, राजगद्देपोर्रो उद्दिदिस मत्तोन्नगा वासि, ओना तिना कय्दे मत्ता पुस्तकमतुन तेंडकुत्ता.

8 बस्के अय्ते गोर्रि पोरि आ पुस्तकमतुन तेंडकुत्ता, अस्के आ नालुं जिवरासि आनि इरवै नालुर पेद्दाल्क गोर्रि पोरिना मुन्ने काल्कुनगा बोक-बोर्ले अर्सि मोळ्ळकतुर. ओर अंटोरा कय्दे उंद-उंदि टांबुरा आनि दूपमते निडिसि मत्ता बंगारमता कुळ्ळकां मत्तां. आ दूपमते निडिसि मत्ता कुळ्ळकां इत्ते, पेनदा लोकुल्कुना पारतनां आंदुं.

9-10 पज्जो ओर अंटोर उंदि पूना पाटा पारालय दल्गतुर, “निमे इद पुस्तकमतुन एतसि, दाना सिक्कान नेम्हाचि विच्चनालायक मंतिन. बारित्ते, निमे मोक्कु आसि नीवा नेत्तुर कुदुवा दोस्सि हरेक जातिताल, हरेक बासानोरवेटाल, हरेक लोकुल्कुनाल आनि हरेक देसेमतोरवेटाल पेनदाहाटीं अस्कुत्तिन. निमे ओर्कुन पेनदाहाटीं दाना राज्यमतोर आनि पेर्मालोर्क कीतिन. ओर बूमिपोर्रो राज्येम कीतुर.”

11 पजा नना अगा हळते, आ राजगद्दे सुट्टु, अव नालुं जिवरासिना सुट्टु आनि पेद्दाल्कुना सुट्टु पेनदा वेल्लेन दूताना लेंग केंजावाता. अव दूतां लेक्कुते लाकुल्क, कोट्टुने मत्तां.

12 “मन्कालोर इद गोर्रि पोरिन हव्विस मत्तुर गानि, संपत्ति, बुद्धि, बलम, कदर, महिमा आनि स्तुतिता लायक इदे आंद,” इल्हा अव अन्नि दूतां पेद्दा आवाजते इंचेके मत्तां.

13 अचोने आयाका स्वर्गमते, बूमिपोर्रो, बूमि हिळ्ळ, समुद्रम आनि अवुने मनानव अन्निगुडा, “राजगद्देपोर्रो उद्दनोनद आनि गोर्रि पोरिनद, स्तुति, कदर, महिमा आनि बलम बस्केळ्ताहाटीं मन्निकांटी,” इंचि इनानद नना केंजतन.

14 अस्के जीवाते मनना नालुं जिवरासीं “आमीन” इत्तां. पजा पेद्दाल्क टोंगरां ऊनसि आरादना कीतुर.

6

गोरे पोरि एडुं सिक्कान लेहमळ

1 पजा एडुं सिक्कानाल उंदि सिक्कातुन आ गोरे पोरि नेम्हाचि विच्चुता. अस्के जीवाते मत्ता आ नालुं जिवरासिनाल उंदि जिवरासि, पिडगु वाटते वायानसोंटा आवाजते, “वा” इत्तद नना कैजतन.

2 अस्के अगा नाकु उंदि तेल्ला गुर्म दिसता, दानपोरो वरोर बानम पीसि उद्दिदिस मत्तोर. ओन्क उंदि किरिटम हियमळ जर्गता. ओर लडाई गेलसतोर, अयनागानि इंका गेलसना इंचि पेयसतोर.

3 गोरे पोरि रोंडो सिक्कातुन नेम्हाचि विच्चुता अस्के, जीवाते मत्ता आ नालुं जिवरासिनाल रोंडो जिवरासि, “वा” इंचि इत्तद नना कैजतन.

4 अस्के उंदि एर्राटा गुर्म पलाते पेयसानद नना हळतन. लोकुल्लक वरोंक-वरोर हक्कुकुनना इंचि, अद गुर्मपोरो उद्दिदिस मत्तोन्कु, बूमिपोरोटाल सांतिनुन येतकुनना अदिकारम हियमळ जर्गता. ओन्क उंदि पेद्दा कसेर हियमळ जर्गता.

5 बस्के अस्के गोरे पोरि मूडो सिक्कातुन नेम्हाचि विच्चुता, अस्के मूडो जिवरासि, “वा” इत्तद नना कैजतन. पजा नाकु अगा उंदि कर्रे रंगुना गुर्म दिसता. आ गुर्मपोरो उद्दिदिस मत्तोना कयदे उंदि तराजु मत्ता.

6 अच्चोटेन, जीवाते मत्ता आ नालुं जिवरासिना नड्डुमताल, “उंदि रोजुना बूतितच्चोन कोत्ताने, उंदि किलो गोह्कु दोर्कता, इंका अचोने कोत्ताने मूड किलोना जोन्नां दोर्कता. गानि नियदुन, अंगुर पानकमतुन नासडेम कियमा,” इंचि उंदि लेंग कैजावाता.

7 गोरे पोरि नालुंगो सिक्कातुन नेम्हाचि विच्चुतस्के जीवाते मत्ता आ नालुं जिवरासिनाल नालुंगो जिवरासि, “वा” इत्तद नना कैजतन.

8 पजा नाकु अगा उंदि पस्पु रंगुना गुर्म दिस्ता. आ गुर्मपोरो उद्दिदिस मत्तोना पोरोल हामुर, ओना पज्जो-पज्जो नरकम वासेक मत्ता. ओन्क बूमिता नालुं बागाल्लुकुनाल उंदि बागमपोरोटाल लोकुल्लुकुन कसेरते, कर्वुने, बिमार्कुने आनि केडाता जिवरासिन हेंदाल नासडेम कियाना अदिकारम हियमळ जर्गता.

9 गोरे पोरि हेयुंगो सिक्कातुन नेम्हाचि विच्चुतस्के, पेनदा पोल्लें लोकुल्लुकुन वेहताहाटीं आनि ओरा गवाइ वेहताहाटीं मोक्कु हिय्यना गद्दे हिळु हक्किसि मत्तोर्कुना आत्मान हळतन.

10 आ आत्मां पेद्दा आवाजते, “ए सामि, पवित्र आनि सत्तेम मनानोन, माकुन हक्कुता भूमिपोर्रोटा लोकुल्कुना न्यायम निमे बस्के कीतिन? ओरा न्यायम कीसि मावा नेत्तुरता बदला बस्के एतांतिन?” इंचि वरगेयालय दल्गतां.

11 पजा ओर्क अंटोर्क तेल्ला कपडिं हीसि, “मीकुन हक्कुतापे मीवा दंताता सेवाकुल्कुन आनि विस्वासुल्कुन हक्कना मंता, ओरा लेक्कांगुडा पुरागा आयानदाका मिमेट गळसेप आराम कीम्टु,” इंचि ओर्कु वेहतोर.

12 गोर्रे पोरि हासंगो सिक्कातुन नेम्हाचि विच्चुता, अस्के पेद्दा बुकंप आतद नना हळतन. अस्के पोळ्दु कर्रे गोंगोळिलेसीं कर्रेगा आनि वेळिसअंता बारे नेत्तुरलेसीं एरंगा आता.

13 पेद्दा वळि दुमारम वाते तोया मराता पंडिं बल्हा हिड अरंता, अल्हेने सुक्कां मब्बुनाल भूमिपोर्रो अरतां.

14 मब्बु उंदि कागदेम हुटताप हुटकुंचि मायसोत्ता. अल्हेन हरेक गुट्टा, दीबे अवुना जागानाल जर्गतां.

15 अस्के भूमिपोर्रोटा राजालोर, अदिकारिल्क, सायाबुल्क, सिरमंतुल्क, ताकतवर्क, दासुल्क, दासुल्क आयवोर, इल्हा अंटोर लोकुल्क गुट्टाना बुयाराल्कुने, पेद्दा बंडा सोर्रेने होंचि मकतुर.

16 मक्किसि गुट्टां आनि बंडानतोनि, “मापोर्रो अर्सि, राजगद्देपोर्रो उद्दिस मत्तोना नदरताल आनि गोर्रे पोरिना होंगुनाल माकुन मक्किचट.

17 बारित्ते, पेनदा होंग हुप्सना कतरनाक रोजु एवता. ओरा मुन्ने बोर नित्ता परांतुर?” इंचि इनालय दल्गतुर.

7

1,44,000 लोकुल्कुंक सिक्कां तनमळ

1 इवन्नि जर्गतारित्ते, भूमिता नालुं मूलांक पेनदा नालुं दूतां नित्तिसि मत्तद नना हळतन. अव भूमिपोर्रो आयि, समुद्रमते आयि आनि बवे मराकुन पोर्रो आयि वळितुन वायाकॉटा आपसि पीसि मत्तां.

2-3 अस्के मर्रा उंदि दूतातुन जीवाते मनना पेनदा सिक्कातुन पीसि पोळ्द पेयसनहेंदाल पोर्रो वासेक मनानद हळतन. बव नालुं दूतांक अय्ते, भूमितुन आनि समुद्रमतुन नासडेम कियाना अदिकारम हीसि मत्ता, अव नालुं दूतन अद पेद्दा

आवाजते, “बदवेरादाका अय्ते मोमोट पेनदा सेवाकुल्लकुना कपालमपोर्रो सिक्कां तन्नोम अदवेरादाका बूमितुन आयि, समुद्रमतुन आयि, अल्हेने मराकुन आयि नासडेम कियमट” ईचि इत्ता.

4 अस्के सिक्कां तंचि मत्तोरा लेक्का केंजतन अय्ते, ओर उंदि लक्सा नल्पै नालु वेय्कु मत्तुर आनि अव्टे इस्राएलना हरेक वंसंमता लोकुल्लक मत्तुर.

5-8 यहूदाना वंसंमताल पन्नैड वेय्कु लोकुल्लकुंक सिक्का तनमळ जर्गता. स्त्रेनना वंसंमताल पन्नैड वेय्कु, गादना वंसंमताल पन्नैड वेय्कु, अस्सेरना वंसंमताल पन्नैड वेय्कु, नप्तालिना वंसंमताल पन्नैड वेय्कु, मनसेना वंसंमताल पन्नैड वेय्कु, सिमोनना वंसंमताल पन्नैड वेय्कु, लेविना वंसंमताल पन्नैड वेय्कु, इसाकुना वंसंमताल पन्नैड वेय्कु, जबलुनना वंसंमताल पन्नैड वेय्कु, योसेपना वंसंमताल पन्नैड वेय्कु, बेजामिनना वंसंमताल पन्नैड वेय्कु, इल्हा पन्नैड गोत्राल्लकुना लोकुल्लकुंक सिक्कां वाटमळ जर्गता.

राजगद्देता मुन्ने वेल्लेन लोकुल्लक

9 अद आता पजा, पेनदा राजगद्दे आनि गोर्रो पोरिना मुन्ने तेल्ला कपडिं केरसि, कजूर मराता कोम्मां कय्दे पीसि हरेक जातितोर, हरेक बासातोर, हरेक लोकुल्लक आनि अन्नि देसेल्लकुनोर इल्हा लेक्कुते बोरे लेक्का पर्स अच्चोन मंदितुन नना हळतन.

10 ओर अंतोर पेद्दा आवाजते, “राजगद्देपोर्रो उद्दिदिस मनना मना पेनबाबानगा, गोर्रो पोरिनगा मुक्ति हियना सक्ति मंता” ईचि इनालय दलगतुर.

11-12 अन्नि दूतां राजगद्दे सुट्टु, पेद्दाल्लक आनि जीवाते मत्ता आ नालुं जिवरासिना सुट्टु नित्तिसि मत्तां. अव अन्नि दूतां राजगद्दे मुन्ने बोक-बोर्ले अर्सि पेनदुन आरादना कीसेके इल्हा इनालय दलगतां, “आमीन, स्तुति, महिमा, तेल्वि, ताकत आनि दन्यवाद बस्केळताहाटीं मावा पेनदावे आंदुं, आमीन” ईचि इत्तां.

13 अस्के पेद्दाल्लकुना अव्टेताल वरोर “तेल्ला कपडिं केरसि मन्नानुर ईर बोर आंदुर? ईर बगाटाल वातुर?” ईचि नाकुन पूसकीतोर.

14 अस्के, “नीकु एरपाटे महाराज,” ईचि नना ओन इत्तन. अस्के ओर, “ईर अंतोर वेल्ले तिप्पल्लकुनाल पलाते वातोर आंदुर. ईर ईरा कपडिं गोर्रो पोरिना नेत्तुरते हुक्किसि तेल्लगा कीतुर आंदुर.

15 अदुनहाटी ईर अंतोर इंदके पेनदा राजगद्दे मुन्ने मंतुर. नर्का-पियल गुळितगा मंचि दाना सेवा कीतुर. राजगद्देपोर्रो उद्दिसे मनानोर ईरापोर्रो डेरा कीसि कापाळांतोर.

16 ईरकु इंदकेटाल बस्केने दूपा आयो, कर्वेस्सो, अचोने आयाका ईरकु पोळ्दुना एद्दिहेंदाल दगळागुडा दल्गो.

17 बारित्ते ईर अंतोर्कुन मेहानोर, राजगद्दे नड्डुम उद्दिसे मनना गोर्रो पोरि आंदुर. ओर ईरकुन पिस्वरता एता उटानगा ओंतोर. पेन ओरा कळ्ळुना कंडेहकुन पुरागा उसमंता,” इंचि वेहतोर.

8

एडुंगो सिक्कातुन विच्चुमळ

1 गोर्रो पोरि एडुंगो सिक्कातुन नेम्हाचि विच्चुतस्के स्वर्गमते सगम गंटादाका सुम-साम आता.

2 अस्के पेनदा मुन्ने नित्तिसि मननव एडुं दूतन नना हळतन. अवुंक एडुं तूताकोम्कु हियमळ जर्गता.

3 अगा इंकुदि पेनदा दूता गद्देतगा वासि नित्तुता. दाना कय्दे बंगारमता गुगलेम कुळका मत्ता. दान्क राजगद्दे मुन्ने मनना बंगारमता गद्देपोर्रो अंतोर पेनदा लोकल्कुना पारतनांतोनि गुगलेम वाटानाहाटीं वेल्लेन गुगलेम हियमळ जर्गता.

4 अस्के पेनदा दूताना कयदाल अद गुगलेमता पोया पेनदा लोकल्कुना पारतनांतोनि पेनदागा एवता.

5 आ दूता दूपमता कुळकाते गद्देतगा मत्ता तळमितुन निहाचि अदुन बूमिपोर्रो पोहचीता, अदुनहेंदाल मब्बु गळ-गळा इंचेके उरमालय, मेर्सालय, बुकंप आयालय दल्गता.

एडुं दूतां तूताकोम्कु उहकमळ

6 अस्के तूताकोम पीसि मत्ता अव एडुं दूतां तूताकोम्कु उहकालय तयार आतां.

7 मोदाटा दूता तूताकोम उहकता, अस्के नेत्तुर कलियसि मत्ता बंडां आनि तळमि बूमिपोर्रो अरता. अरतस्के बूमिता मूड बागाल्कुनाल उंदि बागम आनि मराकुना मूड बागाल्कुनाल उंदि बागम कर्विसोत्ता. इंका पच्चाटा जाळिगुळा पुरागा वेसोत्ता.

8 रौंडो दूता तूताकोम उहकता, अस्के तळमितोनि पोतसेके मत्ता उंदि पेद्दा गुट्टातसौटद बतलो समुद्रमते वाटमळ जर्गता. दानहेंदाल समुद्रमता मूड बागाल्कुनाल उंदि बागम नेत्तुरलेसीं आसोत्ता.

9 अदुनहेंदाल समुद्रमते जीवाते मत्ता जिवरासिना मूड बागाल्कुनाल उंदि बागम जिवरासीं हासोत्तां. आनि समुद्रमते मत्ता जहाजकुना मूड बागाल्कुनाल उंदि बागम नासडेम आता.

10 पेनदा मूडो दूता तूताकोम उहकता, अस्के मब्बुनाल डिबिटलेसीं पोतसेके उंदि पेद्दा सुक्का बूमिपोर्रो अरता. अद सुक्का मूड बागाल्कुनाल उंदि बागम बैरहक आनि एता उटानपोर्रो अरता.

11 अद सुक्काता पोरोल कयमुल. दानहेंदाल एता मूड बागाल्कुनाल उंदि बागम एर कयमुल आसोत्ता. अद एर उट्टाहाटीं वेल्लेन मनकालोर हासोत्तुर.

12 नाल्गो दूता तूताकोम उहकता, अस्के पोळ्दु वेडसि आनि सुक्कां इवुना मूड बागाल्कुनाल उंदि बागम नासडेम आता. अदुनहाटीं अवुना मूड बागाल्कुनाल उंदि बागम हीकट आता. पोद्दाला-नर्कागुडा मूड बागाल्कुनाल उंदि बागम हीकट आसोत्ता.

13 पज्जो उंदि गुव्वा डेगातुन मब्बुन नड्डुमतल परियसेक वायनद हळतन अद जोरते इल्हा इनानद केंजतन: “इंदके मूड दूतां अवुना तूताकोम उहकानदे मंता, अव अवुना तूताकोम उहकतस्के बूमिपोर्रो मनना अंटोर्क इरगा गोसा आयार! गोसा आयार! गोसा आयार!”

9

कपालमपोर्रो सिक्का हिलवोर्कु वायना गंडाल्कु

1 पजा हेय्युंगो दूता तूताकोम उहकता, अस्के मब्बुनाल उंदि सुक्का बूमिपोर्रो अरता. आ सुक्काक वेल्लेन लोत मत्ता पोक्काता चाबि हीतद नना हळतन.

2 आ सुक्का, लोत मत्ता पोक्काता तल्पुन तेंडता, अस्के पेद्दा बट्टिताल पेय्सना पोयालेहका आ पोक्काताल पोया पेय्सता. दानहेंदाल पोळ्दु, वळि हीकट आसोत्तां.

3 आ पोयाताल गोल्लाबामा पुळ्कु पेय्सि बूमिपोर्रो वातां. बूमिपोर्रोटा मिच्चोर्क बसोटा ताकत मंतनो असोटेदे ताकत अवुंक हियमळ जर्गता.

4 आ गोल्लाबामांकु, बूमिपोर्रोटा जाळितुन आयि, बवे पच्चटा पोर्का, मराकुन आयि, नासडेम कियानायो. बोरा कपालमपोर्रो अये पेनदा सिक्का तंचि हिल्लेनो सिराप ओर्कुने नासडेम कियाना इंचि वेहामळ जर्गता.

5 मनकालोर्कुन हक्काना अदिकारम अये अवंक हिल्ले, गानि हेय्युं नेल्कुनदाका ओर्कुन तकलिपते अरहना अदिकारम हियमळ जर्गता. अबुनाहेंदाल आयाना तकलिप, मनकन मिच्चो कस्कुते बल्हा मनंता अल्हा मत्ता.

6 अव रोजकुने लोकल्क हामुरतुन पहकंतुर, गानि ओर्कु हामुर दोर्को. हामुर कोरांतुर गानि ओर्कु हामुर दोर्को.

7 आ गोल्लाबामां, लडाइहाटी तयार कीता गुराल्कुनलेसी दिस्सेक मत्तां. अबुना तल्लानपोर्रो बंगारमता किरिटम दोसताप मत्ता. अबुना मोकाल्क मनकालोरा मोकाल्कुनलेसी दिस्सेक मत्तां.

8 अबुना केल्लक मुरताह्कुना केल्लकुनलेसी मत्तां. अबुना पल्कु सिंहमता पल्कुनलेसी मत्तां.

9 अव कच्चिता अंगिं केरसि मत्तां. अबुना रेक्काना आवाज अये, लडाइ कियालय वित्तना वेल्लेन गुराल्कुना रताल्लकुनलेसी मत्तां.

10 अवंक मिच्चोनलेसी तोकां, कोंडिं मत्तां. मनकालोर्कुन हेय्युं नेल्कुनदाका तकलिपते अरहचि ईराना ताकत, अबुना तोकाने मत्ता.

11 वेल्लेन लोत पोक्काता दूता, अवंक राजाल आसि मत्ता. इब्रानि बासाते दान अबदोन आनि ग्रीक बासाते अपुलोन इंचि इंतुर.

12 इद मोदाटा गंडम पेय्शि होल्ता. मुन्ने ईका रोंडु गंडाल्कु वायानव मंतां.

हासंगो तूताकोम उह्कमळ

13 हासंगो दूता तूताकोम उह्कता, अस्के पेनदा मुन्ने मत्ता बंगारमता गद्देता नालुं कोह्कुनाल उंदि लेंग नना केंजतन.

14 आ लेंग, तूताकोम पीसि मत्ता हासंगो दूतातुन, “परात इनना पेद्दा बैरेटगा दोहासि मत्ता नालुं दूतन होळसीम,” इंचि इत्ता.

15 अदे वेला, अदे रोजु, अदे नेला, अदे वर्साताहाटीं होळसालय पेन अबुन तयार कीसि मत्ता. बूमिपोर्रोटा लोकल्कुना मूड बागाल्कुनाल उंदि बागम लोकल्कुन हक्कानाहाटीं आ नालुं दूतन होळसीयमळ जर्गता.

16 आ गुराल्कुनपोर्रो वायना सिपाइल्क लेक्काते पुरा इरवै कोट्कु मत्तुर इत्तद नना केंजतन.

17 नना हळता दर्सनमते, आ गुराल्कुनपोर्री उद्दिदिस मत्तोर केरता कच्चिता अंगिं, तळमितलेसीं रगारगा, नेळि पंडि रंगुलेसीं आनि गंदकम रंगुनव मत्तां. अवुना तल्लां सिंहमता तल्लानलेसीं दिस्सेक मत्तां. इका अवुना तोळदाल तळमि, पोया, गंदकम पेय्सेक मत्ता.

18 आ मूड गंडाल्कुनाहेंदाल इत्ते, गुराल्कुना तोळदाल पेय्सना तळमि, पोया, गंदकम इवुनाहेंदाल बूमिपोर्रीटा मूड बागाल्कुना लोकल्कुनाल उंदि बागम लोकल्कुन हक्किसि पोहमळ जर्गता.

19 आ गुराल्कुना ताकत अवुना तोड्डिने, तोकाने मत्ता. अवुना तोकांक तरास तल्लानलेसीं तल्लां मत्ताहाटीं, अव लोकल्कुन कस्किसि ओर्कुन तिप्पल्क किय्युंदूं.

20 अव गंडाल्कुनाहेंदाल अच्चोन तिप्पल्क वायिनागानि बोर अय्ते हाया हिल्लुरो, ओर ओरा कराब कबाहकुनाल मनसु मार्सकुन्ना हिल्लुर. ओर देय्याल्कुन इत्ते, वळ्का पर्खव, केंजा पर्खव, ताका पर्खव बंगारम, एंडि, रागि, बंडा, कट्टेतोनि तयार कीता बोम्मन मोळकसेकेन मत्तुर.

21 अचोने आयका लोकल्कुन हक्कमळ, होदें कियमळ, बोगमतनाल्क कियमळ, दोंगातनाल्क कियमळ इसोटा कबाहकुनालगुडा मनसु मार्सकुन्ना हिल्लुर.

10

पेनदा दूता आनि सिन्ना पुस्तकम

1 पजा, उंदि ताकतवर दूता मब्बु तेर्पेतुन मुच्चुंकि स्वर्गमताल हिळु रेय्सि वायानद नना हळतन. दाना तल्लापोर्री सिंगिड मत्ता. मोकोम पोळ्दुनलेसीं आनि काल्क तळमिता कंबालेसीं मत्तां.

2 विच्चिसि मत्तद उंदि सिन्ना पुस्तकम दाना कय्दे मत्ता. अद दाना तिना कादुन समुद्रमपोर्री, आनि रोड्डा कादुन बारे बूमिपोर्री इरता.

3 पजा सिंहम मोत्कुत्ताप पेद्दा आवाजते मोतकुत्ता. अस्के एडुं मल्कां उस्मताप गड्डेल इंचि आवाज वाता.

4 आ एडुं मल्कां गड्डेल इत्ता आवाज वातस्के, अवुन नना रासानदे मत्ता, अस्केने स्वर्गमताल उंदि लेंग, “एडुं मल्कां उस्मता आवाजताल केंजता पोल्लेन रासमा, अवुन मक्किचि इरी,” इंचि इत्तद नना केंजतन.

5 समुद्रमपोर्रो आनि बूमिपोर्रो काल्क इरसि नित्तिसि मत्ता दूता, स्वर्गमताहेके तिना कय हाहतद नना हळतन.

6 पजा अद दूता, बोर अय्ते स्वर्गमतुन आनि अव्ते मनना अन्नित्वुन, बूमितुन आनि अव्ते मनना अन्नित्वुन, समुद्रमतुन आनि अव्ते मनना अन्नित्वुन तयार कीतोर, बस्केळ्ळ जीवाते मनना आ पेनबाबाना पोरोलते ओट्टु तिचि इल्हा इत्ता, “इंका आल्सेम आयो.”

7 गानि एडुंगो दूता दाना तूताकोम बस्के अय्ते उह्कारो, अस्के पेन दाना सेवाकुल्लु आता कबुरतोर्कुं वेह्चि मत्ता परकारम, दाना मर्ममता पोल्ले पुरागा आयनुं.

8 स्वर्गमताल वाता बद लेंगुन अय्ते नना केंजसि मत्तानो, अदे लेंग मर्रा नाकुन, “होन! होंचि समुद्रमपोर्रो आनि बूमिपोर्रो काल्क इरसि नित्तिसि मनना दूताता कय्दे, विच्चिसि मत्ता पुस्तकमतुन तेंडकुन,” इंचि इत्तद नना केंजतन.

9 अस्के आ दूतातगा होंचि, “नीवा कय्दे मनना अद सिन्ना पुस्तकमतुन नाकु हीम,” इंचि इत्तन. अस्के अद नाकुन, “इदे दीन पीसि तिन्नु. इद नीवा पीटुन अय्ते कयमुल कीता, गानि नीवा तोड्डुक मात्रम तेनेलेसी तिथ्यगा दलंगंता” इंचि इत्ता.

10 अस्के आ पुस्तकमतुन दूताता कय्दाल तेंडकुंचि तित्तन. तित्तस्के अय्ते ना तोड्डुक अद तेनेलेसी तिथ्यागेन दलगता गानि पीर मात्रम कयमुल आसोत्ता.

11 पजा आ दूता नाकुन, “मरुंदि मल्का निमे होंचि हरेक बासा वळकानोर्कुंक, राजुल्लुकुंक, वेल्लेन लोकुल्लुकुंक आनि दुनियाता अन्नि देसेल्कनोर्कुंक, वायाना कालमते ओरपोर्रो बतल जर्गानद मंतानो, अदुना बारेमते बविस्थवानि वेहा” इंचि इत्ता.

11

इव्वुर गवाइदार्क

1 पजा, कहाना पट्टितसोंटद उंदि पट्टि हीसि बोरो नाक इल्हा वेहतोर, “निमे तेदसि, पेनदा गुळितुन आनि गद्देतुन कहा. इंका गुळितगा बच्चोर लोकुल्लुक अय्ते आरादना कीतुर ओर्कुन लेक्का.

2 गानि गुळिता पलाते दारातुन कहामा, अद यहुदि आयवोर्कुंक हीसि मंता. पवित्र सहरतुन नल्चै रोंडु नेल्लांदाका ओर जारांतुर.

3 पजा नना नावा इव्वुर गवाइदारकुंक बविस्यवानि कियाना अदिकारम हीतन, ओर पोतां हुटकुंचि पन्नेंड नुहकुना अरवै रोजकुनदाका बविस्यवानि कींत्तुर.”

4 आ इव्वुर गवाइदार्क इत्ते, बूमिपोर्रोटा सामिना मुन्ने नित्तिसि मनना रौंडु जय्तुन मराक आनि रौंडु दीसोडिं आंदु.

5 ओक्कला बोरन्ना आ गवाइदार्कुनपोर्रो अन्यायम कियालय हळते, ओरा तोळदाल तळमि पेय्सि ओरा नुकसान कियालय हळना पगातोर्कुन बूळ्दि कीसि पोहंता. अवुना नुकसान कियालय हळानोर्कुंक तप्पाकोटा इसोटा हामुरे वायार.

6 आ गवाइदार्क बविस्यवानि कियाना रोजकुने ओक्कला पिर्ग वायानय्ते अदुन आपाना अदिकारम ओर्कु हीसि मत्ता. अचोने आयाका ओर्कु बस्के अनपिस्ते अस्के, एतुन नेत्तुरते मार्समळ आनि बूमिपोर्रोटा लोकुल्लकुंक तीराता तकलिप्क हियना अदिकारमगुडा ओर्कु हीसि मत्ता.

7 पेनदा बारेमते ओरा गवाइ वेहामळ आतस्के, लोत पोक्काताल उंदि जिवरासि पलाते पेय्सि वासि ओरतोनि लडाइ किय्यार. लडाइ कीसि ओर्कुन गेल्लि हळ्कार.

8 ओरा पीनगुल्लु आ पेद्दा सहरता हर्दे अरसि मनंतां. इगेन ओरा सामिनगुडा कूसनपोर्रो वेलाड वाट्सि मत्तुर. वैरे अर्तमते, अद सहरतुन सदोम आनि इजिप्त इंचि इंतुर.

9 मडुननरा रोजकुनदाका अन्नि जातिनोर, हरेक बासा वळकानोर, अटोर लोकुल्लक, दुनियाता अन्नि देसेल्लुकनोर ओरा पीनगुल्लुकन हळांतुर, गानि ओर्कुन बोदा मान्रम दोस्सा हिय्युर.

10 ओर इव्वुर कबुरतोरहेंदाल बूमिपोर्रो वेल्लेन तकलिपकु वासि मत्तां. अदुनहाटी ओर हातुर इंचि बूमिपोर्रोटा लोकुल्लक वेल्लेन कुसिते पंडगुल्लुक कियानुर, वरोंक-वरोर इनामकु हीकुनानुर.

11 गानि मडुननरा रोजकुना पज्जो, पेनदाहेंदाल पिस्वरता ऊपिर वासि ओरव्ते नेंगता. अस्के ओर तेदसि नित्तुर. अस्के ओर्कुन हळता लोकुल्लक इरगा वेरियतुर.

12 पजा स्वर्गमताल उंदि पेद्दा लेंग, “इगे पोरो वटु” इंचि इत्तद ओर इव्वुर गवाइदार्क केंजतुर. केंजसि उंदि मब्बु तेपेते कलियसि ओरा पगातुर हळानेकेन स्वर्गमताहेके पोरो होत्तुर.

13 अच्चोटेन अदे वेलाते अगा पेद्दा बुकंप आता, अद सहरता पदि बागाल्लुकुनाल उंदि बागम नासडेम आता. अद बुकंपता हेंदाल एडु वेय्कुना लोकुल्लक

हासि होत्तुर. आनि बोर अय्ते पिस्सि मत्तुरो, ओर इरगा वेरियतुर, वेरियसि स्वर्गमते मनना पेनदा महिमा कीतुर.

14 रौडो गंडम आसोत्ता. हुळाट! मूडो गंडम बिरानेन वासेक मंता.

एडुंगो दूता तूताकोम उह्कमळ

15 एडुंगो दूता तूताकोम उह्कता, अस्के स्वर्गमते पेद्दा आवाज केंजावाता. अद आवाज, “दुनियाता पूरा राज्येम मना सामिनद आनि ओना किरिस्तुनद आता. युगा-युगाल्कुनदाका ओरे राज्येम कीतोर,” इंचि इत्ता.

16 अल्हा इत्तस्के, राजगद्देन पोर्गे उद्दिस् मत्ता आ इरवै नालुर पेद्दाल्क पेनदा मुन्ने काल्कुनगा बोकबोर्ले अर्सि, पेनदुक आरादना कीतुर.

17 कीसि, “अन्निटकन्ना एक्को सक्तिमंतुन आता मावा पेनदुना! निमे मुन्ने मत्तिन, इंदकेगुडा मंतिन. इंदके निमे नीवा ताकततुन हुपिच्चि राज्येम कियालय सुस्व कीतिन. अदुनहाटी मोमोट नीकु दन्यवाद कीतोम.

18 नीकुन एरपाट कियवा लोकुल्क नीवा विरोद कीताहाटी नीकु होंग वाता. हातोरा न्यायम कियाना वेला इंदके एव्ता. अल्हेने नीवा सेवाकुल्कुंक, नीवा पोल्ले वेहाना कबुरतोर्कुंक, नीवा लोकुल्कुंक, नीकु वेरियसि पिस्साना सिन्नाल्कुंक-पेद्दाल्कुंक इनाम हियना वेला एव्ता. अचोने आयाका बूमितुन नासडेम कीतोर्कुन नासडेम कियाना वेलागुडा वाता,” इंचि इत्तुर.

19 पजा स्वर्गमते मत्ता पेनदा गुळि कुल्ला आता. अय्ते अगा पेनदा करारकुना संदुग दिस्ता. अस्के इरगा मेर्समळ, उस्ममळ, पिडगु वाटमळ, बुकंम आयमळ जर्गता पजा इरगा बंडां अरतां.

12

मुरतळ आनि उंदि पेद्दा मासुल तरास

1 अद आता पजा, स्वर्गमते नाकु उंदि पेद्दा चिन्ह दिस्ता. अद बतल इत्ते, उंदि मुरतळ पोडदुन कप्पिडलेसी पोंडसि मत्ता. दाना काल्कुना हिळु वेळसि आनि तल्लापोर्गे बारे पन्नेड सुक्काना किरिटम मत्ता.

2 अद मुरतळ पीटे मत्ता. मुरतटा एरपूराना वेला वासि मत्ताहेंका अद नोप्पिने तनलाळसेक मत्ता.

3 पजा स्वर्गमते नाकु इंकुंदि चिन्ह दिस्ता. अद बतल इत्ते, उंदि एर्णाटा पेद्दा मासुल तरास मत्ता. दानकु एडुं तल्लां, पदि कोहकु मत्ता. एडुं तल्लानपोर्नी एडुं किरिटालकु मत्तां.

4 अद तरास दाना तोकाते, मब्बुने मनना सुक्काना मूड बागाल्कुनाल उंदि बागम सुक्कान इगिस बूमिपोर्नी अरहता. एर पूरालय आसि मत्ता मुरतळ, एर पूरतारित्ते, दाना पेळान मिंगनाहाटीं आ तरास, मुरतटा मुन्ने होंचि नित्तिसि मत्ता.

5 अद मुरतळ वरोर मर्रिन कंता. ओर अन्नि राज्येलकुनपोर्नी कच्चिता सलाकिलेसीं कडक राज्येम कियानोर मत्तोर. गानि आ पेळान पेनदागा, दाना राजगद्देतगा ओयमळ जर्गता.

6 अस्के अद मुरतळ बय्लि जेगातेके वित्तुता. अगा दानाहाटीं, पन्नेड नुहकुना अरवै रोजकुनदाका बेस हळकुननाहाटीं पेन जेगा तयार कीसि मत्ता.

मासुल तरासतुन स्वर्गमताल पलाते गेदुममळ

7 पजा स्वर्गमते उंदि लडाइ आता. पेनदा मिकायेल इनना दूता, दाना दंटा दूतन पीसोंचि, मासुल तरास आनि दाना दूतानतोनि लडाइ कीता. अस्के मासुल तरासगुडा दाना दूतन पीसि मिकायेलुनतोनि लडाइ कीता.

8 गानि मासुल तरास, दाना दूतां लडाइ गेल्ला परा हिल्लें. अदुनहाटीं स्वर्गमते मनालय अवुंक जेगा दोर्काहिल्ले.

9 पजा अद मासुल तरासतुन आनि दाना दूतन बूमिपोर्नी दोब्बिसीयमळ जर्गता. अद तरास दाना दूतनतोनि कलियसि पूरा दुनियातुन पसांचेके मंता. इद मासुल तरासुन पडाना तरास, हिलाकोटे पसांचनदु, हिलाकोटे देय्यम इंचि इंतुर.

10 पजा स्वर्गमताल उंदि पेद्दा लेंग केंजावाता. अद इल्हा मत्ता, “मा पेनदा मुन्ने मावा विस्वासुल्कुनपोर्नी नर्का-पिय्यल बस्केळ्ळक दोसेम दोस्सेके मनानदुन हिळ्ळ बूमिपोर्नी दोब्बिसीयमळ जर्गता. अदुनहाटीं पेन मनाकु हियना मुक्ति, ताकत, राज्येम आनि दाना किरिस्तुना अदिकारम पलाते अरता.

11 गोर्रि पोरिना नेत्तुरताहेंदाल, ओर वेहता गवाइ हेंदाल देय्यमतुन गेल्लसतुर. ओर्कु हामुर वायिनागानि ओर ओरा जीवाता पर्वा किया हिल्लुर.

12 अदुनहाटीं स्वर्गम आनि स्वर्गमते मनानोरिता मिमेट कुसिते मंटु. गानि बूमिपोर्नी आनि समुद्रमते मनानोर्क मात्रम बच्चोन गोसा वायार! बारित्ते देय्यमतगा

वेल्ले टाइम हिल्ले इंचि दान्क तेळियसे मंता, अदुनहाटीं अद वेल्लेन होंगुने मिहगा वाता,” इंचि केंजावाता.

मुरतटुन तिप्पल्क कियमळ

13 बस्के अय्ते अद तरासतुन बूमिपोर्गे दोब्सीतुर, अस्के अद तरास आ पेळान कंता मुर्ताटुन परेसान कियालय दान पज्जो दल्गता.

14 गानि दानाहाटीं पेन तयार कीसि इरता जेगातगळ्क, अद तरासुनाल तपिचुंकि परियिसि होनालय पेन दानकु गद्दल रेक्कानसोंटव रोंडु रेक्कां हीता. दानहेंदाल मूडुननरा वर्सनदाका अद मुरतटुन बेस हळकुन्मळ जर्गता.

15 आ मुरतळ कम्मुटे पोंगिस होनना इंचि तरास दाना तोळदाल बेरेडतालेसीं एर पेचाहता.

16 गानि बूमि आ मुरतळ्क सहायम कीता, तरास तेंडता एतुन अद मिंगसि वाटता.

17 इदुनहेंदाल तरासुंक मुरतळ पोर्गे बागा होंग वाता. अस्के तरास आ मुरतटा कळमता वंसंमतोरतोनि, पेनदा आदेसकुनपोर्गे ताकानोरतोनि आनि येसुना गवाइ वेहानोरतोनि लडाइ कियालय होत्ता.

18 पजा अद तरास समुद्रमता उस्के पोर्गे होंचि नित्तुता.

13

समुद्रमताल रोंडु जिवरासीं पेसमळ

1 पजा नना उंदि जिवरासि समुद्रमताल पेयसानद हळतन, दानकु पदि कोहकु, एडुं तल्लां मत्तां. कोहकुनपोर्गे पदि किरिटाल्कु मत्तां, तल्लानपोर्गे पेनदुन अपमानम कियानव पोरोलीं रासि मत्तां.

2 नना हळता जिवरासि सिर्तागंडुनलेसीं मत्ता, दाना काल्क एडजुना काल्कुनालेसीं मत्तां आनि दाना तोड्डि सिंहमता तोड्डिलेसीं मत्ता. मासुल तरास दाना ताकत, दाना राजगद्दे आनि पेद्दा अदिकारम आ जिवरासिक हीता.

3 अद जिवरासिता एडुं तल्लानाल उंदि तल्लाक हायानसोंटा देब्बा दल्गिसि पुन्नु आसि मत्ता, गानि अद पुन्नु बेस आतद हळसि, दुनियातोर अंटोर इचंन्रम आसि दान पज्जो होनालय दल्गतुर.

4 अद जिवरासिक मासुल तरास अदिकारम हीताहाटीं अंटोर मासुल तरासतुन मोळ्कालय दल्गतुर. पजा ओर, “अद जिवरासितालेसीं बोरन्ना मंतुरा? दानतोनि बोरन्ना लडाइ किया परीतुरा?” इंचि अद जिवरासितुनगुळा मोळ्कालय दल्गतुर.

5 अद जिवरासि पेद्दिदकेमते आनि अपमानम कियाना पोल्लें वळकानाहाटीं पेन दानकु नल्पै रौंडु नेल्लांदाका अदिकारम हीता.

6 पजा अद जिवरासि, पेनदुन, दाना पोरोलतुन, दाना जागातुन, अल्हेने दानतोनि स्वर्गमते मनानोर्कुनगुडा अपमानम कियालय दल्गता.

7 दान्क पेनदा लोकल्लुकुनतोनि लडाइ कीसि ओर्कुन गेल्लसानद अदिकारम हियमळ जर्गता. इच्चोने आयाका दान्क हरेक जाति, हरेक बासा, हरेक लोकल्लुक आनि दुनियाता अन्नि देसेल्लुकुना लोकल्लुकुनपोर्रो अदिकारम हियमळ जर्गता.

8 बूमिपोर्रो मनना अंटोर इद दुनिया तयार आतागटाल, बोरा पोरोल्क अय्ते, मोक्कु आता गोर्रो पोरिना पिस्वरता पुस्तकमते हिल्लेंगो, ओर अद जिवरासितुन मोळकानुर.

9 बोर्क अय्ते केव्क मंता ओर बेस केंजिरकांटी.

10 जेल्लुक होनना मत्तोर, जेलने अर्नानुर. बोर अय्ते कसेटे हव्कंतोर, ओनगुडा कसेटेन हव्कमळ जर्गार. इदुन पीसि पेनदा लोकल्लुकुना विस्वासम, ओप्के दिस अर्ता.

बूमिताल पलाते तेंडता जिवरासि

11 पजा नना मसंदि जिवरासितुन बूमि लोप्पोटाल पोरो वयानद हळतन, दान्क गोर्रो पोरिनलेसी रौंडु कोहकु मत्तां. अद मासुल तरासुनलेसी वळकसेक मत्ता.

12 इद जिवरासि, हायानसोंटा देब्बा दल्लिसि बेस आता मोदाटा जिवरासिता पूरा अदिकारम दाना मुन्नेने वाळकुंचि कबळ कियुंदु आनि बूमिपोर्रो मनना अंटोर्कुन आ मोदाटा जिवरासितुन मोळकानाल कियुंदु.

13 अल्हेने लोकल्लुक हळानेकेन स्वर्गमताल बूमिपोर्रो तळमि अरहुंदु, इल्हा अरहचि अद पेद्दा-पेद्दा चिन्हां हुप्सुंदु.

14 मोदाटा जिवरासिता मुन्ने इद जिवरासिक चिन्हां हुप्सना अदिकार दोर्कता, अदुनहाटीं चिन्हां हुपिच्चेक बूमिपोर्रो मनना लोकल्लुकुन, “बद जिवरासिक अय्ते हायानसोंटा देब्बा दल्लिसि मत्ता, अद जीवाते मंता अदुना बोम्मा कीम्टु,” इंचि बोकिचुंदु.

15 मोदाटा जिवरासिता बोम्मा वळकागोम इंचि बोम्माते जीवोत्रम वाटानद, आनि अदुन बोर अय्ते मोळकुर, ओर अंटोर्कुन हव्कना अदिकार दीनकु हियमळ जर्गता.

16 अचोने आयाका अद, सिन्नुर-पेद्दुर, सिरमंत-गरिब, दासुल्क आयवोर, दासुल्क ईर अंटोर्कुन ओरा तिना कयपोर्री हिलाकोटे कपालमपोर्री उंदि-उंदि सिक्का वाटागोटता.

17 अद सिक्का इत्ते जिवरासिता पोरोल हिलाकोटे दाना उंदि नंबर आंद. इल्हा सिक्का बोर्क अय्ते मन्नो ओनकु बतले अम्मावायो, आनि एतावायो.

18 इद पोल्ले तेळियगोम इत्ते बुद्दि गावाले. बुद्दि मत्ता मनकल जिवरासिना लेक्का कियिरकांटी. अद लेक्का वरोर मनकन हुप्संता आनि अद हारं नुहकुना अरवै हारं आंद (666).

14

गोर्रे पोरि आनि 1,44,000 लोकुल्क

1 मर्रा नना सियोन इनना गुट्टापोर्री पेनदा गोर्रे पोरि नित्तिसि मत्तद हळतन. अगा दानतोनि उंदि लक्सा नल्पै नालुं वेय्कुना (1,44,000) मंदि मत्तुर. ओरा कपालमपोर्री गोर्रे पोरिना आनि दाना बाबाना पोरोल रासि मत्ता

2 नना स्वर्गमताल उंदि इसोटा आवाज केंजतन गदा, अद पोंगाना एता वेल्लेन वर्दानालेसीं आनि बागा मब्बु उस्मनालेसीं मत्ता. अद आवाज टांबुरा नेकिसते बल्हा केंजा वांतनो अल्हे केंजा वासेक मत्ता.

3 आ उंदि लक्सा नल्पै नालुं वेय्कुना मंदि राजगद्देता मुन्ने, नालुं जिवरासिना मुन्ने आनि पेद्दाल्कुना मुन्ने पूना पाटा पारसेके मत्तुर. बूमिपोर्रीटाल पेन अस्कुत्ता लोकुल्कुनाल ईर तप्पा बोरे आ पाटा पारा पर्रीहिल्लुर.

4 ईर अंटोरगुडा मरमिं आयवोर, मुर्ताह्कुनाल लक्कु मंचि सतातुन पवित्र इरतोर आंदुर. गोर्रे पोरि बगा-बगा अय्ते होनुंदु ईर अंटोर दाना पज्जो-पज्जो होनानोर आंदुर. ईर अंटोरगुडा पेन आनि गोर्रे पोरिनाहाटी मोदाटा पलम आयगोम इंचि अस्कुत्तोर आंदुर.

5 ओरा तोळ्दाल बस्केन आबद्दम पोल्ले पेय्सा हिल्ले, ओर बेक्सुर लोकुल्क आंदुर.

मूड दूताना आदेस

6 अद आता पजा नना पेनदा इंकुंदि दूतातुन मब्बुना नड्डुमताल परियसेक मननद हळतन, दानागा बूमिपोर्री मनना अंटोर्क, हरेक जातितोर्क, हरेक बासा वळ्कानोर्क,

अंतोर लोकल्लुकुं आनि दुनियाता अन्नि देसेल्लुकुना लोकल्लुकुं वेहालय बस्केळक पिस्सना पिस्वर बारेमता बेसता कबुर मत्ता.

7 अद दूता पेद्दा आवाजते, “पेन न्यायम कियाना वेला दग्गेर्क एवता. अदुनहाटीं दानकु वेरियट्टु, दाना महिमा कीम्टु. स्वर्गमतुन, बूमितुन, समुद्रमतुन आनि एता ऊटान तयार कीता पेनदा आरादना कीम्टु” इंचि इत्ता.

8 अद आता पजा इंकुंदि दूता वासि, “नासडेम आता, नासडेम आता, पेद्दा बेबिलोन सहर नासडेम आता, अद अन्नि जातिना लोकल्लुकुं दाना बोगमतनमता होंग वायानसोंटा कल्लु उह्ता” इंचि इत्ता.

9-10 पजा इंकुंदि मूडोव दूता वासि, “बोरे आयिर अद जिवरासितुन आनि दाना बोम्मातुन मोळिकसि, ओना कपालमपोर्रो आयि हिलाकॉटे कयपोर्रो आयि दाना चिन्हाता सिक्का वाटकुंतोर, ओरगुडा तालिते वळियसि मत्ता पेनदा होंगुना पिच्चर कल्लु उनानुर, उंचि पवित्र दूतन मुन्ने, गोर्रे पोरिन मुन्ने रमा-रमा पोत्तना तळमिते आनि गंदकमता सिक्काते अर्रानुर.

11 अल्हा ओर वेयनेके पेय्सना पोया बस्केळक पोर्रो तेदसेकेन मनंता. बोर अय्ते आ जिवरासितुन आनि दाना बोम्मातुन मोळकंतुर, दाना पोरोलता चिन्हाता सिक्का वाटकुंतुर ओर नर्का-पियल तकलिपतेने मनंतुर,” इंचि इत्ता.

12 अदुनहाटीं पेनदा आदेस परकारम ताकानोर आनि येसु सामिना पोर्रो विस्वासम कियाना पेनदा लोकल्लुकुं तिप्पल्लुकुने ओप्के पियमळे गावाले.

13 अस्के स्वर्गमताल उंदि आवाज, “इल्हा रासा, बोर अय्ते सामिन विस्वासम कीसि हातुर, ओर इंदके नसिबतोर आंदुर,” इंचि नाक केंजावाता. “हो! निजमे, ओरा कस्टमताल ओर्क आराम दोर्कता. ओर कीता कबाहक ओरतोने दांतां,” इंचि आत्मा इत्तद केंजावाता.

बूमिपोर्रोटा पंटातुन कोयमळ

14 पजा नना हळतस्के, नाक तेल्ला मब्बु तेर्पे दिसता. आ तेल्ला मब्बु तेर्पेपोर्रो मनकना रूपमते पुटोनलेसीं वरोर उद्दिस मत्तोर. ओना तल्लापोर्रो बंगारमता किरिटम आनि ओना कय्दे वेल्लेन करा-करा मत्ता उंदि हेटेळ मत्ता.

15 इंका उंदि दूता पेनदा गुळिताल पेय्सि, मब्बु तेर्पेपोर्रो उद्दिस मत्तोन, “बूमिपोर्रोटा पंटा कोताक वासि अदुन कोय्याना वेला एवता अदुनहाटीं निमे नीवा हेटेटे अद पंटातुन कोय्या” इंचि जोरसे वेहाता.

16 अस्के तेल्ला मब्बु तेर्पेपोर्रो उद्दिदस मनानोर ओना हेटेळ तिरहातोर, तिराहचि बूमिपोर्रोटा पंटातुन कोयमळ जर्गता.

17 अस्के पेनदा इंकुंदि दूता स्वर्गमते मनना गुळिताल पेय्सता. दानागा गुडा वेल्लेन करा-करा मत्ता हेटेळ मत्ता.

18 अस्के गद्देताल पेनदा इंकुंदि दूता वाता. अद दूताक तळमिता अदिकारम हीसि मत्ता. इरगा करा-करा मत्ता हेटेळ पीसि मत्तोनु पेद्दा आवाजते, “बूमिपोर्रो मनना अंगुर पंडिना पंटा पंडता अदुनहाटी नीवा इरगा करा-करा मत्ता हेटेटे अंगुर गुत्ति कोय्या” इंचि इत्ता.

19 अस्के आ दूता दाना हेटेटे, बूमिपोर्रोटा अंगुर पंडिना गुत्ति कोय्सि, पेनदा होंगु इनना अंगुर पंडिना गानगुने वाटसीता.

20 पजा सहरता पलाते मत्ता गानगुनगा गानगु पियमळ जर्गता. अद गानगुताल नेत्तुर पोर्रो वाता. अद नेत्तुर इच्चोर पेय्सता गदा, गुरील्कुना मोसोटुन दोहाना पट्टानच्चोर एत्तु आनि मूड न्हकुना किलोमिटर पोंगसेक होत्ता.

15

पेनदा होंगुने निंडता बंगारमता एडुं वाटिं

1 अस्के स्वर्गमते नना मसुंदि पेद्दा इचंन्रमता चिन्ह हळतन. अद बतल इत्ते, एडुं दूतानगा, एडुं गंडाल्कु मत्तां. अव आकिरता गंडाल्कु आंदुं. अव आता पजा पेनदा होंग सल्लारंता.

2 बोर अय्ते आ जिवरासि, बोम्मा आनि दाना पोरोलता नंबरतोनि लडाइ कीसि गेल्लि मत्तुर, ओर अंतोर पेनदा टांबुरां पीसि आ समुद्रमता ओड्डुनपोर्रो नित्तिस मत्तद नना हळतन

3 पेनदा सेवाकुड मूसाना पाटा आनि गोर्रो पोरिना पाटा पारसेके ओर इल्हा इनुंदुर, “ए अन्निकन्ना एक्को सक्तिमंतुन आता मावा सामि पेनदुना, नीवा कबाहक पेद्देय आनि इचंन्रमतव आंदुं, निमे बस्केळ्ळक मंदना राजान आदिन, नीवा हर्नि नीतितद, आनि सत्तेमतद आंदुं,

4 हे सामि सिराप निमेने पवित्र मंतिन, असोंटस्के नीकु वेरियाकोंटा, नीवा पोरोलता महिमा कियाकोंटा बोर मना परीतोर? नीवा न्यायमंतुन अंतोर हळतुर, अदुनहाटी दुनियाता अन्नि देसेल्कुना लोकुल्क निहगा वासि नीके मोळ्ळानुर.”

5 अद आता पजा, गवाइता डेराता गुळितुन, स्वर्गमते कुल्ला कीसि मत्तद नना हळतन.

6 आ गुळिताल एडुं दूतां एडुं गंडाल्कुन पीसि पलाते पेयसतां, अव जगा-जगा तेल्लगा मेर्सना कपडिं केरसि मत्तां. अबुना सातिक बंगारमता पट्टां दोहाचि मत्तां.

7 अस्के आ नालुं जिवरासिनाल उंदि जिवरासि, अव एडुं दूतांक, बंगारमता एडुं वाटिं हिता. आ वाटिने युगा-युगाल्क जीवाते मंदना पेनदा होंग निडिस मत्ता.

8 अस्के अद पूरा गुळि पेनदा महिमाता वेल्गुने आनि ताकतहेंदाल पोयातोनि निडिस होत्ता. पजा आ एडुं दूताना अव एडुं गंडाल्कु पूरा मारनदाका अद गुळि लोप्पो बोरे नेंगा परीहिल्लुर.

16

एडुं गंडाल्कु

1 अस्के गुळिताल उंदि पेद्दा आवाज आ एडुं दूतनतोनि, “होन्टु! पेनदा होंगुना अव एडुं वाटिन बूमिपोरें वळियटु” इत्तद नाकु केंजावाता.

2 अदुनहाटीं पेनदा मोदाटा दूता होंचि, दाना वाटितुन बूमिपोरें वळियसीता, अस्के अद जिवरासिता निसानि मत्तोर्कु आनि बोर अय्ते दाना बोम्मातुन मोळ्ळकुंदुर ओर्कु इरगा नोयाना लसा-लसा पुनकु आतां.

3 पेनदा रोंडो दूता दाना वाटितुन समुद्रमते वळियसीता, अस्के अद समुद्रम हाता मनकना नेत्तुरलेसीं आसोत्ता, पजा समुद्रमते मनानव अन्नि जिवरासि हासोत्ता.

4 पेनदा मूडोव दूता दाना वाटितुन बरेहकुने आनि एता ऊटान पोर्गे वळियसीता, अस्के अव्ते मत्ता पूरा एर नेत्तुरलेसीं आसोत्ता.

5 एतापोर्गे अदिकारम मत्ता पेनदा दूता इल्हा इनानद नना केंजतन, “ए पवित्र पेनदुना, निमे इंदके मंतिन, मोदालागुडा मत्तिन. निमे न्यायम कियाना पेनदुन, निमेने इवुना इल्हा न्यायम कीतिन.

6 बारित्ते ओर नीवा पवित्र लोकल्लुकुन, नीवा कबुरतोर्कुन हव्विसि ओरा नेत्तुर पोंगागोटतुर. अदुनहाटीं निमे ओर्कु उनालय नेत्तुर हीतिन, ओर इदुना लायके मंतुर,” इंचि इत्ता.

7 अच्चोटेन मोक्कु हियाना गद्देताल, “ए पेनबाबा, सामि, निमेने अन्निकन्ना सक्तिमंतुन आता पेनदुन आंदिन. निमे कियाना न्यायमते निजम आनि सत्तेम मंता,” इंचि नाकु केंजावाता.

8 नालुंगो दूता दाना वाटितुन पोडदुन पोरो वळियसीता, अस्के लोकलुकुन दाना दगळते कर्वगोटाना अदिकारम पोळ्दुक हियमळ जर्गता.

9 कडक दगडाहेंदाल लोकलुक कर्विसोत्तुर, अस्के आ गंडालुकुन पोरो अदिकारम मत्ता पेनदुन अपमानम कीतुर गानि ओर दाना महिमा कियानाहाटी सतता पापालुकुनाल मनसु मार्सकुन्ना हिल्लुर.

10 पेनदा हेयुंगो दूता दाना वाटितुन आ जिवरासिता राजगद्देपोरो वळियसीता. अस्के दाना राज्येमते पुरागा हीकट आता. पजा तिप्पलुकुंक आगा पराका लोकलुक ओरा नाल्के ओरे कोर्कुकुनालय दलगतुर.

11 ओर्क वाता तिप्पलुक, ओर्क आता पुनकुन हेंदाल स्वर्गमे मनना पेनदा अपमानम कीतुर. गानि ओर कीता पापालुकुनाल मनसु मार्सकुना हिल्लुर.

12 पेनदा हायुंगो दूता दाना वाटितुन परात इनना पेद्दा बेरेटे वळियसीता. अस्के अद बेरेटा एर बोत्तिगा इनकिसि होत्ता, पोळ्द पेय्सना दिक्कुने मनना राजालोर्कुंक हरी आयगोम इंचि आ दूता अल्हा कीता.

13 पजा नना अद मासुल तरासता तोळ्दाल, आ जिवरासिता तोळ्दाल, पेनदा आबद्दम कबुरतोना तोळ्दाल पन्नेतसोंटा मूड दुस्तात्मां पलाते पेय्सानद हळतन.

14 इव चिन्हां हुप्सना देय्यालुकुना आत्मां आंदु, आत्मा अन्निकुन्ना एक्को सक्तिमंतुड आता पेनबाबानतोनि आकिरता रोजकुने लडाइ कियानाहाटी, दुनियाता अंतोर राजालोर्कुन उंदि कियालय ओरगा होंचेके मंतां.

15-16 अव आत्मां आ राजालोर्कुन इब्रानि बासाते अरमिगदोन इनना जेगातगा कल्पतां. अदुनहाटी येसु, “हुळाट नना मिहगा दोंगानलेसीं वांतन, बोर अय्ते तेल्विते मंचि, केराना कपडिन कापाळकुंतोर ओरे आसिर्वाद दोर्कतोर आंद. बोरे आयिर अल्हा मनाकोटे मेंदुल कुळकें दिस्सि लोकलुकुना मुन्ने ओनद ओरे सिगु पोगोटकुंतोर आंतोर” इंचि वेहतोर.

17 पेनदा एडुंगो दूता दाना वाटितुन वळि पोरो वळियसीता, अस्के स्वर्गमे मनना गुळिता राजगद्देताल पेद्दा आवाजते, “बोत्तिगा आता” इत्तद केंजावाता.

18 अस्के मब्बु मेर्सालय, गळ-गळा इंचि उरमालय दलगता, पजा इद बूमिपोरो लोकलुक पुटतस्केटाल अय्ते, बस्केने आयाहिल्ले असोंटा पेद्दा बुकंप आता.

19 अस्के आ पेद्दा सहरता मूड तुकळां आतां. वेरे-वेरे देसेलुकुना सहरकंता कूल्सि अरतां. पेन दाना तलातला आयाना होंगुना अंगुर कल्दुन पेद्दा बेबिलोन

सहरकु उहानाहाटी अद मति मर्गाहिल्ले.

20 दीबें अबुना जागाताल मायसोत्तां, गुट्टां बग्गेन दिसाकोटा आतां.

21 मब्बुनाल एबै किलो वजन मत्ता बर्प बंडां लोकुकुनपोर्रो अरताहाटी लोकुकुकुं इरगा तकलिप आसि, ओर पेनदा अपमानम कीतुर. अद तकलिप वेल्लेने कतरनाक मत्ता.

17

मुरतळ आनि एर्नाटा जिवरासि

1 अस्के गंडालकुना एडुं वारिं पीसि मत्ता दूतानाल उंदि दूता नाकुन, “हिक्के वा! वेल्लेन एता जलनपोर्रो उद्दिदिस मत्ता बोगमदान्कु दोर्काना सिक्सा बदो नीकु हुप्संतन,

2 बूमिपोर्रोटा राजालोर दानतोनि बोगमतनम कीतुर, दाना बोगमतनमता कल्दुन उंचि बूमिपोर्रोटा लोकुल्क रिम्मालोर आतुर.” इंचि इत्ता.

3 नना पवित्र आत्माते निंडतस्के, आ दूता नाकुन बय्लि जेगाते ओता. अगा पदि कोहकु आनि एडुं तल्लां मत्ता उंदि एर्नाटा जिवरासिपोर्रो उंदि मुरतळ उद्दिदिस मत्तद नाकु दिस्ता. आ जिवरासिता मेंदुलमेड पेनदा अपमानम कियाना पोल्लेंगे रासि मत्तां.

4 अद मुरतळ नेडि पंडि रंगु आनि एर्ना रंगुना कपडिं केरसि मत्ता. इंका डिस्को पूसां, मोतीना दुम्में वाटकुंचि मत्ता. अल्हेने दाना कय्दे बंगारमता वारिं मत्ता. अद वारिंते दाना बोगमतनम कियाना अपवित्र वस्तु आनि दाना पापालक निंडिस मत्तां.

5 दाना कपालमपोर्रो, “पेद्दा बेबिलोन, बोगामोताहकुना अल्हेन हय्सुवा वस्तुकुना तल्लुर” इंचि मर्ममते रासि मत्ता.

6 अद मुरतळ पेनदा लोकुकुना नेत्तुरतुन आनि येसु सामिना गवाइताहाटी जीवा हीतोरा नेत्तुरतुन उंचि रिम्मा आतद हळसि नाकु वेल्ले इचंत्रम आता.

7 अस्के पेनदा दूता नाकुन, “निमे इचंत्रम बारि आतिन? नना इद मुरतळता आनि अद उद्दिदिस मत्ता पदि कोहकु आनि एडुं तल्लां मत्ता जिवरासिता मर्ममतुन वेहांतन,

8 निमे हळता जिवरासि मोदाला मत्ता गानि इंदके हिल्ले, अद वेल्लेन लोत पोक्काताल पेय्सि नासडेमते अररि. दुनिया पुटतस्केटाल बूमिपोर्रो मनानोरा बोरा

पोरोलीं अय्ते पिस्वरता पुस्तकमते रासि हिल्लें, ओर अद जिवरासितुन हळसि, ‘इद मोदाला मत्ता, इंदके हिल्ले गानि मर्रा वायानद मंता’ इंचि इचंन्रम आयानुर.

9 इव पोल्ले तेळियगोम इत्ते तेल्वि-बुद्दि गावाले. अव एडुं तल्लां इत्ते, अद मुरतळ उद्दिदस मत्ता एडुं गुट्टां आंदुं.

10 अल्हेने एडुर राजालोर इंचिगुडा दाना अर्तम आंद. एडुर राजालोरवेटाल हेय्युर अय्ते असोत्तुर. इंदके वरोर मंतोर, इंकावरोर इदवेरदाका वायाहिल्लोर. ओर वातस्के ओन्क कोन्नि रोजकु राज्येम किय्ये पीता.

11 मोदाला मत्ता इंदके हिल्ले इत्ता जिवरासि इत्ते, एनमिदो राजाल आंदु, ओरगुडा एडुर राजालोरसंतोरे गानि ओरगुडा नासडेम आयानुर.

12 निमे हळता पदि कोहकु इत्ते, ओर पदि राजालोर आंदुर. आ राजालोर इदवेरदाका राज्येम ताकसा हिल्लुर गानि ओर्कु आ जिवरासितोनि उंदि गंटादाका राज्येम ताकसना अदिकारम हियमळ जर्गता.

13 ओर अंतोर उंदि मनसु आसि ओरा ताकत, अदिकारमतुन अद जिवरासिक हींतुर.

14 ईर राजालोर गोर्रे पोरिनतोनि लडाइ कियानुर. गानि गोर्रे पोरि सामिल्कुना सामि, राजालोरा राजाल आताहाटीं, अद दाना केयतोर, पेरतोर आनि विस्वासल्कुनतोनि कलियसि आ राजालोर्कुन गेल्लंता,” इंचि इत्ता.

15 अद आता पजा दूता नातोनि, “बोगामोतळ उद्दिदस मत्ता बव एता जलां अय्ते निमे हळतिन, अव जलां इत्ते, वेरे-वेरे लोकुल्क, वेरे-वेरे लोकुल्कुना मंदां, वेरे-वेरे देसेल्कुनोर, वेरे-वेरे बासां वळकानोर आंदुर.

16 इंका निमे हळता जिवरासि आनि दाना पदि कोहकु, आ बोगमतनम कीता मुरतटुन हैय्मों. दान दिक्कु हिल्लाकोंटा कीसि दाना कपडिं हिलाकोंटा कीतां. दाना मेंदुलता हव्विन तिंचि, तळमिंते वाटसीतां.

17 बारित्ते पेनदा पोल्ले पुरागा आयानदाका, ओर अंतोर राजालोर उंदि मनसु आसि ओरा राज्येमतुन जिवरासिक हियना इंचि पेने ओरा मनसुने वाटता.

18 इंका निमे हळता मुरतळ इत्ते, दुनियाता राजालोरपोर्रे राज्येम कियाना पेद्दा सहर आंदु” इंचि वेहता.

18

बेबिलोनता नासडेम

1 अद आता पजा नना उंदि पेनदा दूतातुन स्वर्गमताल हिळ् रेयसेक मत्तद हळतन, आ दूताक वेल्लेने अदिकारम हीसि मत्ता. दाना महिमाता वेल्युने बूमिअंता जगगरा आता.

2 आ दूता पेद्दा आवाजते वरगेयसि, “हिळारता, बेबिलोन पेद्दा सहर हिळारता. इंदके अद देय्याल्क, दुस्ट आत्मां मनना जागा आता. बताके ओज्जुवव आनि हय्सुवा पिट्टें अगा जागा पीतां.

3 बारित्ते, दाना बोगमतनमता कल्लु अन्नि देसेल्कुनोर उट्टुर. बूमिपोर्रोटा राजालोर दानतोनि बोगमतनम कीतुर, अद बोगमतनम कीसि कमय कीता दनमताहेंदाल बूमिपोर्रो दंदा कियाना लोकल्क सिरमंतल्क आतुर” इंचि वेहता.

4 अस्के स्वर्गमताल इंकुंदि आवाज इल्हा केंजावाता गदा, “ना लोकल्कुनिटा दाना पापमते कलियमट्टु, दानपोर्रो वायना गंडाल्कु मीपोर्रो वायामान्नि इत्ते दानगटाल पलाते पेय्सट.

5 दाना पापाल्कगुडा वेल्लेन आसि स्वर्गमदाका एवतां, पेनगुडा दाना तप्पुड कबाह्कुन मति कीता.

6 अद मीतोनि बल्हा कीतनो अल्हे मिमेटगुडा दानतोनि कीम्टु, अद कीता कबाह्कुनाहेंदाल दान्क रोंडु अंताल्क हीम्ट. बद वाटिते अय्ते अद मीकु निहाचि हीता अदे वाटिते मिमेटगुडा रोंडु अंताल्क निहाचि हीम्ट.

7 अद बल्हा अय्ते पेद्दिदेरकेमते, सुकमते मत्ता, अल्हेने दान्क तिप्पल्क, दुक्काल्क हीम्ट. बारित्ते अद दाना मनसुल्कुने, नना रानिन आंदुन, मुंडामोस्तादान आयोन, इंका नना बस्केने तिप्पल्कुने अर्रीन,” इंचि इनकुंता.

8 अदुनहाटीं हामुर, दुक्कम, कर्वु इवन्नि तकलिपकु उंदे रोजुने दानपोर्रो वायानुं, दाना न्यायम कियाना सामि पेनबाबाल दानकन्ना वेल्लेन बलम मत्तोर आताहाटीं अदुन तळमिते बोळिस बूळ्दि कियानुर.

9 बूमिपोर्रोटा बोर राजालोर अय्ते दानतोनि बोगमतनम कीसि सुकमते मत्तुर, आ राजालोर दानु वेयानद हळसि, सतता साति तंचेके अळानुर.

10 ओर दाना तकलिपकुन हळसि, वेरियसि वेल्लेन लक्कु होंचि नित्तिसि, “अय्यो पेद्दा सहर, ताकत मत्ता बेबिलोन, उंदे गंटालोप्पो नीपोर्रो पेनदा सिक्सा वासि अरता” इंचि इनानुर.

11 ई बूमिपोर्रो दंदा कियानोर, अद वेय्यनदुन हळसि, इंदके ओरा सामानतुन अस्सानोर बोरे हिल्लुर इंचि अळानुर, दुक्कम कियानुर.

12-13 अव सामान बव इत्ते, बंगारम, एंडि, डिस्को पूसां, मुच्याल्लकु, मेल्लता कपडिं, नेडि पंडि रंगुना कपडिं, रेसिम कपडिं, अन्नि रकाल्लकुना गमागमा गब्बु वायाना कट्टें, एक्को दराता कट्टें, कच्चि, इत्तोडिता सामान, नुन्टा बंडाना टाइल्सकु, अन्नि तीरकुना मसालां, मसालाते वाटाना सेक्का, दालचिनि,* मसालां, ऊदु, अत्तरनिय्कु, अंगुर कल्लु, निय्कु, मैदा, गोह्कु, गोडकु-कोंदा, एटि-गोरे, गुराल्लकु, रताल्लकु, दासुल्लकु, लोकुल्लकुना जीवां अम्मंदुर, गानि इंदकेटाल इवुन बोरे अस्सुर.

14 नीकु इस्टामाता पंडि निहागटाल लक्कु होत्तां, रुसि आता तिडि, नीकु सुकम दोर्कना वस्तुक नासडेम आतां. मरी अव निहागाटोर्क बोर्के बस्केने दोर्को.

15-17 इव वस्तुकुन अम्मिसि अद सहरताहेंदाल सिरमंतुल्ल आता आ दंदा कियानुर, दाना तिप्पल्लुकुन हळसि वेरियसि लक्कु होचि, “नेडि पंडि रंगुना आनि एरी रंगुना कपडिं, बंगारम, डिस्को पूसां, मुच्याल्लकुना दुम्मे वाटसि मत्ता पेद्दा सहरतुना, उंदे गंटालोप्पो नासडेम आसोत्तिन इंचि बादा पळसेके अळंतुर.” जहाजकु ताकसानुर, अव्ते उद्दिस होनानुर, अव्ते कबळ कियानुर, अल्हेने समुद्रमताहेंदाल कोत्तां कमांचना हरेक मनकल दान नासडेम आयानद हळसि लक्कु होचि नित्तांतुर.

18 अद सहर वेयाना पोया हळसि, “अद सहरतालेसी पेद्दा सहर बदाना मंताना?” इंचि इनानुर.

19 पजा ओर वेल्लेन दुक्कमते, ओरा तल्लनपोरी दुब्बा दोसकुंचि, दुक्कमते, अळसेके, वरगेयसेके, “अय्यो पेद्दा सहरतुना, समुद्रमते जहाजकु मनना हरेक मनकल नीहेंदाल सिरमंतुल्ल आतुर. गानि उंदे गंटालोप्पो निमे पुरागा नासडेम आतिन” इंचि इनालय दल्यांतुर.

20 “ए स्वर्गमते मनानोरिता, पेनदा पवित्र लोकुल्लकुनिटा, प्रेरितुल्लकुनिटा आनि पेनदा कबुरतोरिता, अद सहर नासडेम आताहाटी कूस आम्टु, अद सहर मीकुन हरी तप्पिस्ता इंचि पेन दानकु दगता सिक्सा हीता” इंचि आ पेनदा दूता वेहता.

21 अस्के वेल्लेन बलम मत्ता उंदि पेनदा दूता, जोत्तातसोंटा पेद्दा बंडातुन तेहचि समुद्रमते वाटसि इल्हा इत्ता, “पेद्दा बेबिलोन सहरतुन नासडेम कियानाहाटी पेनगुडा इल्हे पोचंता, पजा अद मरी बस्केन दिस्साकोंटा आयार.

22 टाबुरा नेकसानोरा, पाटा पारानोरा, तूरीला उहकानोरा, तूताकोम उहकानोरा

* 18:12-13 इद्दु उंदि मसालाते मनना उंदि सेक्का आंदु.

आवाज इंदकेटाल बस्केने नीवा लोप्पो केंजा वायो. निहगा कबाहक कियानोरगुडा इंदकेटाल बस्केने दिस्सुर. जोल्ता नोराना आवाज गुडा निहगा केंजा वायो.

23 इंदकेटाल नीवा लोप्पो पंतेना वेळसि बस्केने दिस्सो. मरमिने एगराना-दुनकाना सप्पुड बस्केने केंजा वायो. बारित्ते निहगा दंदा कियाना लोकुल्क पूरा बूमिपोर्रो पेद्दाल्क मत्तुर, इंका निमे नीवा होदें-मंत्राल्कु कीसि अन्नि देसेल्कुनोर्कुन पसांचतिन.

24 निहगा पेनदा कबुरतोरा नेत्तुर, पेनदा लोकुल्कुना नेत्तुर अल्हेने वेंरे लोकुल्कुना नेत्तुर दिस्ता” इंचि वेहता.

19

स्वर्गमते पेनदा स्तुति

1 अस्के स्वर्गमते वेल्लेन मंदिलेसी पेद्दा आवाजते, “हालेलुया! मुक्ति, महिमा आनि ताकत मा पेनदा कय्देन मंता,

2 अद कियाना न्यायम सत्तेमतद आनि नीतिगल्लद आंद, बारित्ते बेबिलोन सहर बोगमतनम कीसि पूरा दुनियातुन हेळाहता. अदुनहाटी पेन दान्क सिक्सा हीसि दाना सेवाकुल्कुना बदला येतता,” इंचि इनानद केंजावाता.

3 मसंदि मल्का ओर, “हालेलुया! अद सहर वेय्याना पोया युगा-युगाल्कुनाहाटी पेय्सेकेन मनंता,” इंचि इत्तुर.

4 अस्के आ इरवै नालुर एनकटा पेद्दाल्क आनि आ नालुं जिवरासी राजगद्देपोर्रो उद्दिंस मत्ता पेनदा काल्कुनगा टोंगरां ऊनसि, “आमीन हालेलुया!” इंचि मोळकतुर.

5 अस्के राजगद्देताल उंदि आवाज, “ए पेनदुक वेरियसि पिस्साना दाना सेवाकुरिता, मिमेट सिन्ना-पेद्दा बोरे आम्पु, अंतोर पेनदा स्तुति कीम्पु,” इंचि इनानद केंजावाता.

6 पजा नाकु वेल्लेन मंदितालेसी आवाज, वेल्लेन एता तळाना आवाज आनि मब्बु उस्मताप आवाज केंजावाता. अद आवाज, “हालेलुया! सामि मना पेनबाबाल वेल्लेन सक्तिमंतुड आंदुर. ओरे राज्येम ताकिचेके मंतोर.

7 गोरें पोरिना मरमिं दगोर्क एवतां, मरमिं आयालय मरमिना पेगिडगुडा तयारे मंता. अय्ते वट्ट, मनम आनंदमते, कुसिते दाना स्तुति कीकोम.

8 दान्क पौडालय साप-सुतरा तेल्लाटा आनि मेर्सना मलमल कपडिं हीतुर. आ मलमल कपडिं इत्ते, पेनदा लोकुल्क कीता नीति कबाहक आंदु” इंचि वेहानद नना कैजतन.

9 पजा पेनदा दूता नाकुन, “गोर्रे पोरिना मरमिना गाटो तिनालय बोर्कुनय्ते केयमळ जर्गता औरे आसिर्वाद दोर्कतोर आंदुर.” पजा, “इद पेनदा सत्तेम पोल्ले आंद, इदुन रासा,” इंचि मरी इत्ता.

10 पजा नना आ दूताता काल्क मोळकालय दाना काल्कुनपोर्रे अरतन अय्ते अद नाकुन, “निमे नाकुन मोळकमा. ननागुडा नीलेसी, नीवा दंटाता विस्वासुल्कुनलेसी येसुना बारेमता गवाइ वेहासेके सेवा कियानोने आंदुन. निमे सिराप पेनदुने मोळका. बारित्ते येसुना बारेमता गवाइ इत्तेने बविस्यवानिता आत्मा आंदु.”

तेल्ला गुरमपोर्रे उदमळ

11 अस्के स्वर्गम कुल्ला आसि मत्तद हळतन, अगा नाकु उंदि तेल्ला गुरम दिस्ता. दानपोर्रे उद्दिदिस मत्तोने, विस्वासमगल्लोड, सत्तेमतोर इंतुर. ओर नीतिते न्यायम कीसि लडाइ कीतोर.

12 ओना कळक पोत्तना तळमितालेसी मंतां, ओना तल्लापोर्रे वेल्लेन किरिटाल्कु मत्तां. ओनापोर्रे उंदि पोरोलगुडा रासि मंता, आ पोरोलता अर्तम ओन्क तप्पा बोर्के तेळियो

13 ओर नेत्तुरते मुळहाता कपडिं केरसि मत्तोर. ओना पोरोल “पेनदा पोल्ले” आंद.

14 स्वर्गमते मनना सिपाइल्क तेल्लगा साप-सुतरा मलमल कपडिं केरसि, तेल्ला गुराल्कुनपोर्रे उद्दिदिस ओना पज्जो-पज्जो होंचेके मत्तुर.

15 अन्नि देसेल्कुनोर्कुन हक्कनाहाटी ओना तोळ्दाल उंदि वेल्लेन करा-करा मत्ता कसेर पलाते पेयसंता. ओर आ देसेल्कुनापोर्रे कडक राज्येम ताकसंतोर आनि अन्निटकन्ना सक्तिमंतुड पेनदा होंगुना अंगुर रसमता गानगु पोक्कातुन जारांतोर.

16 ओना कपडि आनि तोडापोर्रे, “राजालोर्कुना राजाल, सामिल्कुना सामि,” इंचि रासि मंता.

17 अस्के पोळ्दुनपोर्रे उंदि दूतातुन निलसि मननद नना हळतन. अद मब्बुन पोर्रे परियना अन्नि पिट्टेन पेद्दा आवाजते, “वट! पेनदा गाटो तिननाहाटी जमा आम्टु,

18 मिमेट वाते, राजालोरा हव्विं, सिपाइल्कुना हव्विं, अदिकारिल्कुना हव्विं, गुरािल्कुना हव्विं, गुरािल्कु ताकसानोरा हव्विं, दासल्कुना हव्विं, दासल्कु आयवोरा हव्विं, इल्हा सिन्ना-पेद्दा अन्नि लोकल्कुना हव्विं तिनालय मीकु दोर्कता” इंचि इत्ता.

19 अस्के अद जिवरासि, दुनियाता राजालोर आनि ओरा सिपाइल्कु गुरमपोर्रो उद्दिदस मत्तोन्नतोनि आनि ओना सिपाइल्कुनतोनि लडाइ कियालय जमा आतद नना हळतन.

20 पजा अद जिवरासितुन आनि पेनदा आबद्दम कबुरतोन्न दोर्का पियमळ जर्गता. ओर कीता चिन्हाणा हेंदाल, अद जिवरासिता सिक्का तंचि मत्तुर्कुन आनि दाना बोम्मातुन मोळ्कानोर्कुन पसांचमळ जर्गता. ओर इव्वुर्कुनगुडा गंदकमते रमारमा पोत्सेके मनना तळमि गुंडमते जीवाते मननेकेन वाटसीयमळ जर्गता.

21 कळमातोर्कुन बारे आ गुरमपोर्रो उद्दिदस मत्तोना तोळ्दाल पेयसता कराकरा कसेटे हळ्कमळ जर्गता. पजा पिटें वासि ओरा अंतोरा हव्विन पीरमेड तित्तां.

20

वेय वर्सानाहाटीं देय्यमतुन दोहाचि इरमळ

1 पजा उंदि दूता, स्वर्गमताल हिळ रेय्सि वायनद नना हळतन. दानागा वेल्लेन लोत पोक्काता तालम कय्क आनि उंदि पेद्दा गोल्सु मत्ता.

2 पजा आ दूता, बदन अय्ते इबलीस, देय्यम इंतुरो आ पळाना मासुल तरासतुन दोर्कापीसि वेय वर्सानाहाटीं दोहाचि वाटता.

3 पजा, वेय वर्सा निंडनदाका वेरे-वेरे देसेल्कुनोर्कुन बोकिच्चा मन्नि इंचि आ दूता दान वेल्लेन लोत पोक्काते वाटसि बंद कीसि दानपोर्रो सिक्कां तंता. वेय वर्सा निंडतस्के जेरासेपताहाटीं दान होळसा पिय्यार.

4 मर्रा राजगद्दे हळतन. अवुनपोर्रो उद्दिदस मत्तोर्कुन न्यायम कियाना अदिकारम हीसि मत्ता. इंका येसुना बारेमते गवाइ वेहताहाटीं आनि पेनदा पोल्ले वेहताहाटीं बोरा तल्लां अय्ते कोयमळ जर्गता, बोरा अय्ते जिवरासितुन हिलाकोंटे दाना बोम्मातुन मोळ्का हिल्लुर आनि कपालमपोर्रो हिलाकोंटे कय्दापोर्रो दाना चिन्ह वाटकुना हिल्लुर असंतोरा आत्मान नना अगा हळतन. ओर मर्रा जीवाते तेदसि किरिस्तुनतोनि कलियसि वेय वर्सनदाका राज्येम कीतुर.

5-6 इदे मोट्टा मोदाटा हासि मर्रा जीवाते तेदमळ आंद. कळमातोर बोर अय्ते हासि मत्तुरो, ओर इव वेय वर्सा निंडनदाका मर्रा जीवाते तेदा हिल्लुर. इल्हा मोट्टा मोदाटा मर्रा जीवाते तेदतोर बोर अय्ते मत्तुरो ओर पवित्र आनि आसिर्वाद दोर्कतोर आंदुर. ओरपोर्गे रोंडो हामुरता ताकत कबळ किय्यो. गानि ओर पेनदा आनि किरिस्तुना पेर्मांलोर आंतुर. आसि किरिस्तुनतोनि कलियसि वेय वर्सा राज्येम कीतुर.

देय्यमतुन तळमिते वाटमळ

7 वेय वर्सा आतारित्ते, दोहाचि मत्ता देय्यमतुन होळसीयमळ जर्गार.

8 अस्के आ देय्यम पलाते वासि, बूमिपोर्गे नालुं मूलाने मनना अन्नि देसेल्कुनोर्कुन इत्ते, गोग, मागोग इनना लोकुल्कुन नडेह कीसि लडाइहाटी जमा कीता. समुद्रमता उस्केलेसी लेक्का परवच्चोन लोकुल्क ओर मंतुर.

9 ओर पूरा बूमिअंता पैलांचि होत्तुर. पजा ओर पेनदा लोकुल्कुना डेरां आनि पेनदा पावरमगल्ला सहरता सुट्टु आतुर. गानि स्वर्गमताल तळमि हिळु रेय्सि ओर्कुन नासडेम कीसि पोहता.

10 अस्के, जिवरासितुन आनि आबद्दम कबुरतोर्कुन बगा अय्ते मुन्नेन वाटतुरो, अदे गंदकमतोनि बगा-बगा पोतसेके मनना तडमिते, ओर्कुन नडेह कियाना देय्यमतुन वाटमळ जर्गता. अगा ओर नर्का-पिय्यल युगा-युगाल्कुनाहाटी तडमि मंटाते तनलाळसेक मनांतुर.

हासि मत्तोर न्यायम कियमळ

11 पजा नना, उंदि तेल्लाटा राजगद्दे आनि दानपोर्गे उद्दिंस मत्तोन हळतन. बूमि, मब्बु ओना मुन्नेटाल पेय्सि वित्तुतां. मर्रा अवुंक बग्गेन जेगा दोर्काहिल्ले.

12 पजा, हासि मत्ता सिन्नाल्कुन-पेद्दाल्कुन अंटोर्कुन राजगद्देता मुन्ने नित्तिसि मत्तद नना हळतन. पुस्तकाल्क विच्चिसि मत्तां. पजा इंकुदि पुस्तकम विच्चुमळ जर्गता, अद पुस्तकम इत्ते पिस्वरता पुस्तकम आंद. पुस्तकाल्कुने रासि मत्ता पोल्लेन पोर्गेटाल, हासि मत्तोर कीता कबाह्कुन पीसि ओरा न्यायम कियमळ जर्गता.

13 अस्के समुद्रम, दानागा हासि मत्तोर्कुन अप्पजेपता. पातालम आनि नरकम, अवुनगा हासि मत्तोर्कुन अप्पजेपता. ओर कीता कबाह्कुन पीसि ओरा अंटोरा न्यायम कियमळ जर्गता.

14 पजा पातालमतुन आनि नरकमतुन तळमिता सेरवुने वाटमळ जर्गता. ई तळमिता सेरवु इत्ते रोंडो हामुर आंद.

15 पिस्वरता पुस्तकमते बोरा-बोरा पोरोलीं अय्ते रासि मना हिल्लेंगों, ओर्कुन अंटोर्कुन तळमिता सेरवुने वाटमळ जर्गता.

21

पूना स्वर्गम, पूना बूमि

1 पजा नना उंदि पूना स्वर्गम, उंदि पूना बूमितुन हळतन. बारित्ते, मोदाटा स्वर्गम, मोदाटा बूमि मायम आसि होत्ता, इंका समुद्रमगुडा मनाहिल्ले.

2 अस्के, पेनदागटाल पवित्र सहर पूना येस्सलेम, स्वर्गमताल हिळु रेयानद नना हळतन. मरमिना पेडानाहाटीं, मरमिना पेगिड बल्हा तयार आंता, अल्हा अद सहर दिस्सेक मत्ता.

3 पजा राजगद्देतगटाल उंदि पेद्दा लेंग इल्हा केंजावाता, “हुळाट, पेन इंदके मनकालोरा नड्डुम जेगा आता. अद ओरतोने मनंता. ओर दाना लोकुल्क आंतुर, अद कुद्दु ओरा पेन आसि ओरतोने मनंता.

4 अद ओरा कळकुना कांडेहकुन उस्मंता. मोदाटा पोल्लें मायसोत्तां, अदुनहाटीं ओर्कु हामुर, दुक्काल्क, बादां, तिप्पल्क मन्नो,” इंचि केंजावाता.

5 अस्के राजगद्देपोरों उद्दिस मत्तोर ओर, “हुळाट! नना अन्निटवुन पूनाव कीसि वाटंतन” इंचि इत्तोर. मर्रा ओर, “इव पोल्लें सत्तेम, विस्वासमलायकतव आंदु, इवुन रासा,” इंचि नाकु वेहतोर.

6 पजा मरुंदि मल्का नाकु इल्हा वेहतोर, “इव पोल्लें पुरागा आतां. अल्पा आनि ओमेगा, मोदोल आनि आकिर ननाने आंदुन. दूपाते मत्तोर्कुक नना पिस्वरता एता ऊटाताल एर पुक्कटते हीतन.

7 गेलसानोर अंटोर इव अन्निटवुना वारसदार्क आंतुर. नना ओरा पेनदुन आंतन, ओर नावा पिलाल्क आंतुर.

8 गानि वेरियानोर, विस्वासम हिल्वोर, कराब कबाहक कियानुर, हळ्कानुर, बोगमतनम कियानुर, होदें कियानुर, बोम्मान मोळ्कानुर आनि आबद्दम वळ्कानुर अंटोर, गंदकमते गबा-गबा पोतसेके मनना तळमिता सेरवुने अर्रानुर. इदु रोंडो हामुर आंद,” इंचि वेहतोर.

पूना येस्सलेम सहर

9 पजा, एडुं वाटिने आकिरता एडुं गंडाल्कुन पीसि मत्ता एडुं दूतानाल उंदि दूता नहगा वासि, “हिक्के वा! नना नीकु मरमिना पेगिटुन, इत्ते गोर्रे पोरिना मुत्तो न हुप्संतन” इंचि इत्ता.

10 अस्के आ दूता, नना पवित्र आत्माते निंडिसि मन्नेंके नाकुन उंदि पेद्दा एत्तु गुट्टापोर्रे ओता. ओसि, पेनदागटाल पवित्र येस्सलेम सहर स्वर्गमताल हिळु रेयानदुन नाकु हुपिस्ता.

11 अद सहर पेनदा महिमाता वेल्गुने निंडिसि मत्ताहेंका दाना कांति यसब इनना वेल्लेन दाराता बंडालेसी मेर्सेक मत्ता.

12 अद सहर सुट्टु उंदि पेद्दा एत्तु गुर्रे मत्ता. दान्क पन्नेंड गल्मां मत्तां. पन्नेंड गल्मानगा पन्नेंड दूतां मत्तां. आ गल्मनपोर्रे इस्त्राएल लोकल्कुना पन्नेंड वंसाल्कुना पोरोलीं रासि मत्तां.

13 पोळ्द पेय्सनहेके मूड गल्मां, पोळ्द अर्रनहेके मूड गल्मां, दक्स्सिनतेके मूड गल्मां आनि उत्तरतेके मूड गल्मां मत्तां.

14 अद सहर सुट्टु मत्ता गुर्रे पन्नेंड पूनादिनपोर्रे निल्सि मत्ता. आ पन्नेंड पूनादिनपोर्रे गोर्रे पोरिना पन्नेंड प्रेरितुल्कुना पन्नेंड पोरोलीं रासि मत्तां.

15 नातेनि वळ्कता दूतातगा, अद सहरतुन, दाना गुर्रेन आनि दाना गल्मन कहालय, बंगारमता उंदि सलाकि मत्ता.

16 अद सहर नालुं मूलाना आकारमते दोहाचि मत्ता. अद सहरता पोडगु आनि नेर्वु समानम मत्ता. अद बंगारमता पट्टिते सहरतुन कहता, अस्के अद सहर 2,400 किलोमिटर पेय्सता. सहरता एत्तु, नेर्वु, पोळ्गु समानम मत्ता.

17 पजा आ दूता सहरता गुर्रेतुन कहतस्के, आ गुर्रे मनकना कूटाते इत्ते दूताता कूटातेगुडा नूटा नल्पै नालुं कूटां मत्ता.

18 अद गुर्रे यसब इनना एक्को दराता बंडाते दोहाचि मत्ता आनि अद सहर काचुनलेसी मेर्साना पिव्वर बंगारमते दोहाचि मत्ता.

19-20 अद सहरता पुनादि, रका-रकाल्कुना एक्को दराता बंडां वाटसि दोहाचि मत्ता. मोदाटा पुनादि यसब बंडाते, रौंडो पुनादि निलमनि बंडाते, मूडो पुनादि यमुना बंडाते, नालुंगो पुनादि मरकत बंडाते, हेय्युंगो पुनादि गोमेद बंडाते, हास्गो पुनादि मानिक बंडाते, एडुंगो पुनादि पीतमनि बंडाते, एनमिदो पुनादि पेरोज बंडाते, तोम्मिदो पुनादि पुकराज बंडाते, पदो पुनादि लहसनि बंडाते, पदाकोडो पुनादि दुम्पकांत बंडाते आनि पन्नेंडो पुनादि याकूत बंडाते दोहाचि मत्ता.

21 आ पन्नेड गल्मां पन्नेड मुच्याल्कुनतोनि तयार कीसि मत्तां. उंद-उंदि गल्मा उंद-उंदि मुच्येमतोनि दोहाचि मत्ता. सहरता हरिं, काचुनलेसी मेर्सना पिब्बर बंगारमते तयार कीसि मत्ता.

22 अद सहरते नाकु गुळि दिसा हिल्ले. बारित्ते अगाटा गुळि अन्निटकन्ना सक्तिमंतुड आता पेनबाबाल आनि गोरि पोरि आंद.

23 अद सहरते वेलगु हियालय पोळ्दु, वेडसिता अक्सरम हिल्ले, बारित्ते पेनदा महिमाता वेलगु अगा कांति हीता आनि गोरि पोरि दाना वेळसि आंद.

24 अन्नि देसेल्कुना लोकुल्क दाना वेडसिता वेलगुने ताकानुर आनि दुनियाता राजालोर अद सहरते ओरा पेद्दातनम पीसि वायानुर.

25 अद सहरते नर्का बस्केने आयो. अदुनहाटीं दाना गल्मां बस्केळ्ळ कुल्लाये मनंता.

26 अद सहरता लोप्पो अन्नि देसेल्कुना लोकुल्क ओरा पेद्दातनम आनि कदर पीसि वांतुर.

27 गोरि पोरिना पिस्वरता पुस्तकमते बोरा पोरोलीं अय्ते रासि मंतां, ओरे अद सहरते होळिया परांतुर. गानि अपवित्र लोकुल्क, पापि कबाह्क कियानुर हिलाकोटे आबद्दम वळ्ळकानुर अद सहरते होळिया पर्स्.

22

पिस्वर हिय्यना बेरेड

1-2 अस्के पेनदा दूता नाकु सक्कगा मिटकरा मनना पिस्वरता एर हिय्यना बेरेटुन हुपिस्ता. अद बेरेड पेनदा आनि गोरि पोरिना राजगद्देताल सुस्व आसि, अद सहरता पेद्दा हरदा नड्डुमताल पोंगसेक मनुंदु. अद बेरेटा ओड्डुंक रोंडु पक्काने पिस्वर हिय्यना मराक मत्तां. अव मराक वर्साता हरेक नेलाते पन्नेड तीरकुना पंडि हादसेकेन मनुंदु. दुनियाता अन्नि देसेल्कुना लोकुल्क अव मराकुना आकिने बेस आयुंदुर.

3 अद सहरते वायना रोजकुने बस्केने सापनेम मन्नो. बारित्ते अगा पेनदा आनि गोरि पोरिना राजगद्दे मनंता. अवुना सेवाकुल्क पेनदा सेवा कियानुर.

4 ओर दाना मोकोम हळांतुर. ओरा कपालमपोरि पेनदा पोरोल रासि मनंता.

5 अगा हीकट बस्केने मन्नो. ओर्कु पोळ्दु, वेडसि वेलगुना अक्सरम मन्नो. बारित्ते सामि पेनबाबाले ओर्कु वेलगु हियानुर. युगा-युगाल्कुनदाका ओरे राज्येम ताकसंतोर.

6 पजा अद पेनदा दूता नातोनि, “इदवेरादाका बतल अय्ते वेहामळ जर्गता अव पोल्लें विस्वासमलायक आनि सत्तेम पोल्लें आंदुं, बव पोल्लें अय्ते बिराना जर्गमळ अक्सरम मंता, अव पोल्लेन दाना सेवाकुलकुंक हुप्सानाहाटीं, कबुरतोरा आत्मान ताकसाना पेने दाना दूतातुन लोहता,” इंचि इत्ता.

येसु किरिस्तु मर्रा वायमळ

7 इवन्नि आता पजा येसु सामि, “हुळाट! नना बिरानेन वासेक मंतन. इद पुस्तकमते वेहिच मत्ता पोल्लेन परकारम बोर अय्ते ताकंतोर, ओरे आसिर्वाद दोर्कुंतोर आंदुं,” इंचि वेहतोर.

8 नना योहानुन, इव पोल्लें कैजतन, हळतन. कैजुड, हळुड आतस्के, अव पोल्लें वेहता दूताता काल्क मोळकानाहाटीं दाना काल्कुनपोर्रो अरतन.

9 गानि अद नाकुन, “निमे नावा काल्क मोळकमा, ननागुडा नीलेसीं, नी दंटाता कबुरतोरलेसीं, इद पुस्तकमते वेहिच मत्ता पोल्लेन परकारम ताकानोरलेसीं पेनदुन मोळकानोने आंदुन. निमे सिराप पेनदुने मोळका,” इंचि इत्ता.

10 अद दूता मर्रा नातोनि, “इद पुस्तकमते वेहिच मत्ता पोल्लें निजम आयाना वेला दगेरा एवता, अदुनहाटीं इद पुस्तकमतुन निमे मक्किचि ईस्मा,” इंचि इत्ता.

11 “अन्यायम कीसेके मनानोर अन्यायम कीसेकेन मन्निरकांटी, हेळसोत्तोर ओर हेळसोंचे मन्निरकांटी, नीतिमंतुड मत्तोर, ओर नीतिमंतुडे मन्निरकांटी, पवित्र मत्तोर, ओर पवित्र मन्निरकांटी,” इंचि इत्ता.

विस्वासुल्कुनाहाटीं गवाइ

12 पजा येसु सामि, “हुळाट! नना बिरानेन वासेक मंतन. हरेक मनकंक ओर कीता कबाह्कुन पीसि, ओन्क इनाम हीतन.

13 ननाने अल्पा, ननाने ओमेगा आंदुन. ननाने मोदाटोन, ननाने आकिर आंदुन. इंका ननाने सुख कियानोन, ननाने महानोन आंदुन.

14 बोर अय्ते ओरा कपडिं हुक्सि बेस साप कीतुर ओर आसिर्वाद दोर्कतोर आंदुर. ओर्क पिस्वर हियना मराता पंडि तिनालय आनि आ गल्माताल सहरते होळियालय अदिकारम दोर्कार.

15 गानि नयकस्केल लोकुल्क, होदेगाह्कु, बोगमतनम कियानुर, हळ्कानुर, बोम्मांक मोळ्कानुर, आबद्दमतुन पावरम कियानुर, आबद्दम वळ्कानुर अंतोरगुडा सहरता पलातेन मनांतुर.

16 येसुन आंदुन. दाविदना वंसंमतोन ननाने आंदुन. हक्केटा मेर्सना सुक्कातुनगुडा ननाने आंदुन, इंचि इव पोल्लेना बारेमता गवाइ कलिसियातार्क वेहनाहाटी नावा उंदि दूतातुन मिहगा लोहतन” इंचि वेहता.

17 पेनदा आत्मा आनि मरमिना पेगिड, “हिव्के वा” इंचि वेहांता. केंजानोरगुडा, “वा” इंचि इन्निरकांटी. दूपा आसि मत्तोर बोरे आयिर इद पिस्वर हियना एतुन पुक्कटते उन्ना वच्चु.

आकिरता पोल्लें

18 इद पुस्तकमते वेहिचि मत्ता वायाना कालमते जर्गना पोल्लेन केंजना हरेक मनकंक इल्हा गट्टिगा वेहासेक मंतन गदा, बोरन्ना इव पोल्लेन बतलन्ना एक्को कल्पानय्ते, इद पुस्तकमते रासि मत्ता गंडाल्कु पेनबाबाल ओनपोर्रो वायागोटनुर.

19 अल्हेने ओक्कला बोरन्ना, इद पुस्तकमते रासि मत्ता मुन्ने जर्गना पोल्लेनाल, बदन्ना पोल्लेतुन तक्को कियिना, इद पुस्तकमते वेहिचि मत्ता, पिस्वर हियना मरा आनि पवित्र सहरताल पेन ओना हिस्सातुन तेंडकुंता.

20 इव अन्नि पोल्लेना गवाइ हीता येसु सामि, “हो नना बिरानेन वासेक मंतन” इंचि वेहासेक मंतोर. आमीन! वा! येसु सामि वा!

21 पेनदा अंटोर लोकल्कुनपोर्रो येसु सामिना कुर्पा मन्निकांटी! आमीन!

Pavitra Polle
Aheri Gondi: Besta Kabur (Bible)

copyright © 2020-2022 Wycliffe Bible Translators, Inc.

Language: (Aheri Gondi)

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 1 May 2025 from source files
dated 1 May 2025

856c9a76-2de1-5675-855a-28be9a349068